

東
華
續
錄

東華續錄

咸豐三十

臣王先謙敬編

臣陶澐宣恭校

十二月辛未朔詔明年元旦停止筵宴○壬申諭軍機大臣等昨因天津練勇需人統束降旨令勝保傳諭文謙卽赴大營督帶鄉勇以資駕馭本日據鴻臚寺卿齊承彥奏請飭票商張錦文隨同照料鄉勇等語該商前於賊撲縣境時捐貲助剿復源源接濟餅餌以爲鄉勇打仗之需好義急公具徵誠悃若令前往軍營必可固結義勇之心該大臣等亦得收驅策之效著文謙迅飭張錦文馳赴該鹽政營中隨同照料鄉勇如能始終奮勉或殺賊立功或捐貲備餉卽著隨時保奏候旨加恩至楊需素得民心惟見在慶祺軍營亦屬乏人著仍畱該侍郎營內協同籌餉並著勝保察看

情形妥爲調度原摺著鈔給閱看將此諭知勝保並諭文謙知之
○琦善陳金綬奏上月二十四日德興阿督率滿漢官兵由東石
人頭進剿適遇賊匪二千餘名分爲三股直撲我隊德興阿亦分
三路衝擊斃賊三百餘名總兵瞿騰龍帶兵過河至運河西岸擊
賊該逆隔水爲營經瞿騰龍設法繞擊殲除多名詎意瓜州賊匪
於是日子刻由運河東岸潛渡楊子橋鈔襲該處鄉勇紮營楊子
橋之北另在楊子橋附近廟內屯紮賊匪將廟圍住而鄉勇尚在
睡夢之中被賊殺害及擄去者數十名維時參將師長鑣等馳往
救援晉康查文經亦各帶兵勇攻剿賊始敗退仍由楊子橋過河
當經馮景尼添勇防守申刻賊復擾赴楊子橋下游渡河而北楊
子橋營中之勇未戰先潰大礮器械盡以資賊旋准晉康咨稱賊
匪分股撲施家橋張翊國帶隊逃走該處已被賊占臣琦善聞信

之餘不勝焦灼遂於二十五日黎明偕臣陳金綬率總兵瞿騰龍挑選各營精銳由三汊河渡至運河東岸該逆羣出抗拒經官兵痛加剿洗殺賊一千數百餘名是日東石人頭之賊亦經德興阿等擊敗殲斃三百餘名當此攻截喫緊之際各勇紛紛潰散並有潰勇千餘人執持器械沿途乘閒搶掠深爲可憾參將馮景尼所轄之勇潰散多名實難辭咎應請旨將該參將卽行革職仍畱營效力以觀後效職員張翊國專司防守施家橋勇數有一千數百名之多是否臨敵逃去應請斥革訊明辦理雷以誠奏自賊匪攻破儀徵進攻樸樹灣由西岸上衝三汊河瓜州之賊遂向東北沿東岸上衝直達桂花莊勢甚鴟張臣與琦善陳金綬慧成彼此相商若非三面會剿難以遏其衝突定期於十一月二十四日黎明進攻當由臣飭張翊國督率各勇目並派千總孫得富帶勇一千

八百名由施家橋分三路進攻詎料該賊眾於五鼓時分隊往北路潛襲馮景尼之營及張翊國帶勇進攻桂花莊土城東路其時南路之勇先到奮力攻擊兩土城登時並破張翊國大隊直趨北路槍礮齊施斃賊無數我勇正向東南進剿不意大股賊匪七八千人由北路冒煙衝出前後夾攻另有大股賊匪分隊由南小路鈔出各勇之後徑撲施家橋四面裹合守營之勇力不能支陣亡過半賊遂闖營放火張翊國正在奮力衝擊見營盤火起乘空抽身殺出身中二槍孫得富身中火銃一處矛傷二處率勇回救亦已無及遂趕赴霍家橋地方紮住嚴守查張翊國督率各勇自會剿連破賊城二座不意爲北路之賊前後夾攻致聲勢隔斷被賊鈔襲營盤各無可辭應將該職員張翊國摘去頂帶以示懲儆臣調度無方亦難辭咎伏乞 皇上將臣交部議處 上諭琦善等

奏賊援腐至鄉勇潰逃經官兵渡河截剿斃賊一摺覽奏焦灼之至琦善統領全軍攻剿揚州賊匪自春及冬擁兵觀望坐令四出衝突近復攻陷儀徵每隔旬餘輒以小勝奏報塞責相持累月餉竭兵疲是誰之罪耶鄉勇等本係烏合之眾與兵丁有閒但當雷以誠初到之時揚州東路本無官兵不能不募勇協剿且屢次帶勇人員亦有斬獲全在該大臣等申明紀律用其銳氣以助兵力之不逮乃任令日久玩生紛紛潰散尙有何顏據以入告甚至賊眾掩至而鄉勇尙在睡夢之中尤出情理之外卽各營鎮將員弁無論何人保奏何人管轄統歸琦善節制何平日漫無稽察直待事機已誤始以諉過之辭奏請查辦前經疊降嚴旨並硃諭斥責該大臣置若罔聞不克早圖收復至此情形支絀罪將焉歸所有一切調度著該大臣迅速通籌如何分路扼守不令逆匪恃眾北

竄於江路運河分別堵截著與陳金綬雷以誠慧成等趕緊籌辦
務將揚城與三汊河及儀徵賊匪斷其援應盡力剿除其在營各
勇尤須加意撫綏激勵勿令效尤潰散流而爲匪其不遵約束者
立卽治以軍律參將馮景尼所轄之勇潰逃多名該員不能約束
罪將何辭著卽革職仍畱營效力以觀後效又據奏晉康咨稱賊
匪分股撲施家橋時職員張翊國帶隊逃走本日復據雷以誠奏
張翊國帶勇進攻桂花莊土城東路因南路之勇先到將兩土城
攻破該匪鈔出南路各勇之後襲營放火張翊國正在奮力衝擊
因見火起抽身殺出身中二槍千總孫得富身中銃傷一處矛傷
二處等語與晉康所咨不符張翊國著先行革職交琦善等確切
訊明有無逃避情節再行據實會奏將此由六百里加緊諭令知
之○諭據青巖奏瀝陳楚北情形一摺見在逆匪竄踞黃州一帶

該處爲皖豫要衝關繫江北大局若非悉力迎擊何以遏賊北竄之衝武昌存城官兵將及二萬乃吳文鎔等坐擁有用之兵於無賊之地是徒知株守一隅置通省全局天下大局於不問老成疆吏何遽出此吳文鎔畏懦形於外而中無布置深堪痛憾臬司唐樹義前因敗退遁回省城已不可解而派援黃州之副將駱永忠又復帶兵回省吳文鎔所謂調度者何在且兩句以來並未據該督等將緊要軍情隨時入告豈徒事閉城坐守遂足爲藏身之固耶著吳文鎔懍遵前旨迅卽督兵出省迎賊所向奮力進攻斷不准再事遷延致干重罪其省城防剿仍著崇綸妥籌布置亦不得藉詞諉卸該督撫身膺重寄儻因各執意見致誤事機朕惟知執法從事決不姑寬也懍之懍之將此由六百里加緊諭令知之○諭御史王兆松奏直隸永平府屬一州六縣無處不有梟匪數月

內官設鹽店被搶者十之八九地方官出一緝捕之票捕役巡役轉藉查拏爲名肆行滋擾以致梟匪千百結夥持械四出搶劫請飭嚴拏等語見在遵化州所屬卽有梟匪糾眾搶劫之案雖經拏獲多名而餘匪尙多在逃永平壤地毗連似此梟匪肆行儻令勾結蔓延必致釀成巨患著桂良嚴飭各該道府會同營汛認真披拏一經拏獲卽行就地正法梟匪聚掠齊心圍捕格殺勿論如有巡役捕役滋擾庇縱亦准擒拏送官加等治罪地方官因循諱飾或捕拏不力卽著從嚴參辦仍著該督先將該府所轄地方鹽店被搶若干處鄉村被搶若干家據實具奏不准稍有回護將此由四百里諭令知之○賞京旗出征兵一月錢糧○賞湖北殉節知府董振鐸子澍員外郎潤泗主事○免福建本年例貢果品○癸酉諭內閣前因天津壯勇守城勦賊甚爲出力降旨嘉獎茲據文

謙奏稱天津各鋪戶每夜分段巡查器械號衣均係自行捐辦數月以來幫同地方查拏奸匪並無疏懈該鋪戶等好義急公同仇志切與前此打仗出力之壯勇均堪嘉尚著文謙先行傳旨獎勵並諭令該鋪戶務各始終奮勉互相保護俟軍務告竣卽行據實保奏候朕施恩○諭軍機大臣等昨據琦善等奏賊援腐至揚州東路鄉勇潰散營盤被賊占踞又據慧成奏邵伯灣頭萬分喫緊各等情覽奏實深焦灼琦善統領大兵圍攻揚州幾及一載屢奏賊勢窮蹙並不乘機進取迅圖克復且與雷以誠慧成等各懷意見畛域太分兵勇各不相顧以致賊援大至鄉勇潰散該大臣等不能和衷共濟坐失事機實堪痛憾揚州東北一路爲高郵寶應及淮安要道施家橋已被賊踞邵伯灣頭一帶最關緊要該大臣等旣知嚴防賊匪北竄爲要又知東路勇不足恃自當迅派得力

提鎮大員帶兵馳赴東路扼要堵擊若陳金綬之兵與琦善同在西北一路但知擁兵自衛竟置東北於不顧該處勇多兵少設使勇盡潰散賊從此路北竄琦善豈能諉罪著卽令陳金綬速帶官兵直趨揚州東北擇要駐紮與慧成雷以誠等合力截剿堵賊北竄萬不可再有疏虞致干重罪陳金綬久歷戎行且係幫辦大臣自到揚州以來未見其獨當一面著有戰功此時東路緊要該提督若再不知奮勉擊賊國法具在豈能再從寬宥耶將此由六百里加緊各諭令知之○諭和春袁甲三奏遵籌臨淮守禦並分兵進援廬州一摺賊匪攻撲廬州情形甚爲緊要和春自當趕緊赴援見在舒興阿所帶官兵業經到齊卽著和春飛咨該督撥兵三千名以資攻剿並知照該督卽於潁州一帶扼要駐紮嚴防逆匪分竄豫楚之路並可剿捕土匪與和春袁甲三互相策應參將劉

玉豹扼守臨淮並可控制各路土匪萬勿令其與南路逆匪勾結
爲患熱河等處官兵已由和春帶赴廬郡著卽知照琦善毋庸調
赴揚州所請籌撥餉銀已有旨令山東河南各籌撥數萬兩解皖
昨據山東奏報已撥五萬兩啟程本日又諭令河南山西迅爲撥
解並令戶部籌議矣將此由六百里加緊諭令知之○諭和春袁
甲三奏徐州糧臺餉銀匱乏請飭近省籌撥銀二十萬兩以資接
濟等語見在皖省官兵雲集需餉甚急前有旨令英桂撥銀五六
萬兩解赴皖省諒已遵辦茲據和春等奏稱徐州糧臺奏撥之款
內有陝西銀四萬九千兩爲河南截畱僅解還銀一萬四千兩又
河南鹽規銀一萬兩地丁銀四萬一千兩屢催未解當此需餉孔
殷應解之款豈容藉詞延玩著英桂將欠解銀兩於河南正雜各
款內迅速籌撥如數解赴徐州糧臺萬不可稍有遲誤並著恆春

於山西省籌銀數萬兩解交皖省以濟要需其山西省應行解部捐輸等款仍著恆春遵照前旨委員迅卽解京並將起解日期先行奏報將此由六百里加緊各諭令知之○諭文謙奏遵旨帶勇赴營會剿兼籌津郡巡防事宜一摺天津爲畿輔屏障見在防剿喫緊該鹽政督守城外關廂地方勸諭練勇著有成效據稱帶勇赴營並往返照料防守自係爲通籌全局起見所有謝子澄前帶各勇著卽派候補同知直隸州宋嵩慶候選知縣耿曰棠輪替在營管帶該鹽政仍與天津道張起鵠更替赴營統帶以期得力務於防剿兩有裨益不至貽誤將此由六百里諭令知之○和春袁甲三奏海州沐陽間捻匪肆橫此孽彼竄近復聚數千人有陳玉標喬鳳來朱廣淵劉雪得等四頭目樹旗搶掠擄脅壯丁該處距徐三百餘里一水可通且距揚州甚近恐與髮逆勾結不可不急

圖剿滅臣袁甲三派撥賊紆青練勇五百名前往助剿期於迅速
掃蕩至蒙亳餘匪因臣袁甲三拔營來宿復至亳州白龍廟以南
聚眾二千餘人聲言報仇當經臣袁甲三飭令該處練總王士元
等邀集團練隨時捕剿頃據稟稱於本月二十二日接仗將該匪
擊敗殺斃三百餘人該匪由雉河集一路竄至蒙城西洋集尙有
七百餘人聲言進城報仇見已飭委員徐曉峯遊擊朱連泰帶領
兵勇三百餘名前赴蒙城會同該縣文武剿辦不難卽時撲滅臣
袁甲三所帶之兵除前派在懷遠三百名撤併臨淮又派赴蒙城
三百名隨營不及百人見在南北兩路處處喫緊臣等惟有殫竭
血誠和衷商辦以期無誤事機報聞○甲戌琦善陳金綬奏臣琦
善於上月二十六日與臣陳金綬面商擬屬臣陳金綬酌帶官兵
遏賊北竄清江之路又慮邵伯鎮以上數百里中河湖相連無地

可以駐兵正在籌議間而瓜州賊匪已由東路各門進城三更以後見城中火光四起遠聞鈔關門一帶人聲沸騰揣知賊匪因被圍已久急思出竄二十七日天色甫曙督令官兵於西北南三面分隊登城見城內賊匪實已無多當卽生擒賊匪訊知大股均從東面竄逸因畱臣陳金綬嚴防西北臣琦善親督官兵四百名馳赴三汊河督同瞿騰龍德興阿帶領滿漢官兵搭橋過河截擊正見南竄之賊絡繹不絕因運河之東又阻有汊河數道無從飛越飭令弁兵施放大礮斃賊多名無如賊匪愈繞愈遠槍礮力不能及而楊子橋賊營卽以鄉勇所棄之大礮向我兵轟擊頗有傷亡是以益難進步遙見賊匪後隊攜帶輜重有騎馬賊目押隊徐行東路各營竟無一兵一勇尾追令人憤惋旋見無數黃旗又復回轉恐賊以退爲進因卽撤隊過河臣琦善馳回西南北三面察看

維時官兵業已進城正在安撫難民忽有鄉勇多人由東面進城焚掠該勇既已縱賊尙欲擾民情節殊爲可惡經臣琦善諭飭如禁止不遵卽令官兵開放槍礮轟打以懲獷悍見在城中難民及老弱殘疾陸續出城者不少因天色已晚仍將城門關閉撥兵看守俟天明後再行清查辦理此時賊匪大股悉赴瓜州理應相機進剿惟運河兩岸賊營相望必須探明虛實方可議攻而三汊河控扼要津一時亦斷難遽撤况賊匪大股竄出勢必沿江肆擾六合浦口均係北岸俱應增兵籌防如六合浦口並無警報卽當收復儀徵進攻瓜州容俟偵探情形斟酌辦理晉康查文經均已退至灣頭惠成所帶之兵均在灣頭屯駐各勇掠民貲財其慘虐甚於盜賊所有招募管帶練勇之參將馮景尼前請革職不足蔽辜應請旨卽行正法五品銜張翊國前經雷以誠派令防守施家橋

是其專責乃竟棄而弗守實屬罪無可逭應請旨發往新疆充當
苦差不准奏畱軍營以肅軍令臣琦善忝膺節制號令不行惟求
皇上從重治罪至慧成雷以誠同膺重寄晉康查文經亦有協
勦之責如此潰散失律致賊匪竄入竄出全由東路貽誤非輕理
合據實參劾恭候 欽定 上諭內閣揚州賊匪窮蹙久思竄逸
各路統兵大員宜如何嚴密設防杜其奔突乃因東面勇潰致令
瓜州賊匪竄入揚州聯爲一氣棄城逃去實堪痛憾馮景尼帶勇
分守楊子橋首先奔潰必應從嚴懲辦以伸國法著卽行正法張
瑚國防守施家橋棄而弗守亦屬罪無可逭著發往新疆充當苦
差以示懲儆雷以誠慧成與晉康查文經均在揚州東路防勦督
率無方均難辭罪琦善統領全軍不能及早克復揚州以致賊從
東路竄出陳金綬幫辦軍務一籌莫展厥罪維均琦善陳金綬雷

以誠慧成著革職晉康查文經著一併革職戴罪自效仍責令琦善等督率晉康查文經並各營將弁迅即將儀徵瓜州逆匪剋日剿除並於江路運河派兵分投堵截儻再不知奮勉致令賊匪紛竄朕惟執法從事決不寬貸○江忠源奏十一月十六日聞該匪攻撲小東門礮臺攜帶雲梯爬城經守備程智泉督飭廣勇施放火礮轟斃長髮賊六名打傷者不計其數始各棄梯回巢查該匪初到時大西門所挖地道既經臣督飭駐守該門之湖南舉人鄒漢勛等從內迎掘其大東門一帶護城有河跨河有橋該匪盤踞橋西民房內日夜用槍礮轟擊我兵亦以槍礮回擊該匪勢不能前十七日早據程智泉稟稱該匪因屢次奪橋均被我兵擊退乃潛於橋北水面編搭浮橋偷近城根開挖地道深廣數丈臣隨卽督飭程智泉親歷月城察看形勢一面諭飭兵勇限於是夜傍城

紮營橋東截其來路是夜亥刻令程智泉統帶廣勇二百餘名由月城南穴地而出直攻地道該匪等從洞口迎頭出窺經外委馮富揮刀直前斬獲長髮首級一顆兵勇等連擲火罐該匪跽伏洞中無一出者維時橋西賊匪竄出千餘人勢甚洶湧程智泉督率廣勇抵死鏖戰一面飭令趕築營盤未及兩時我軍營盤已就兼以城上槍礮如雨該逆敗退斃賊一百數十餘名次日黎明查點洞中燒斃賊匪四十七名合計斃賊二百餘名二十一夜接據已革臬司張印塘呈報十三日會同壽春鎮玉山督率東關兵勇二千名趕緊前進於十七日到廬十八日開仗連搶賊營三座並奪礮臺正力戰間賊忽分股由東面鈔我後路以致馬隊驚潰兵勇慌亂玉山陣亡幸已奪回屍身查驗頭面身腰共受槍傷十七處革司隨復收集殘兵令回店埠駐紮以圖後舉惟西安馬隊帶兵

官伊昌阿柯登額連行逃去經革司力阻不肯少畱見在不知何往等語十九日辰刻於水西門城上遙見紅藍旗幟知係鎖臣音

德布援兵來自六安

臣

當派都司馬良勳統帶兵勇縋城接應旋

與該匪接仗斃賊七十餘名二十二等日該逆不時

分攻各門均經我兵擊退三日約斃賊一百餘名查此次豫防地

道經程智泉督率廣勇奮力直前於城外紮立營盤爭奇奪隘轉

危爲安實屬奮勇可嘉所有尤爲出力各弁願懇恩施以示鼓勵

壽春鎮

臣

玉山督兵赴援捐軀殉難情尤可憫應請旨交部從優

議卹其西安帶兵官伊昌阿柯登額二員於潰散之後經已革臬

司張印璫力阻不肯少畱應請旨將二員交部治罪

上諭逆匪

肆擾應見已連次被創正當乘勢攻剿著江忠源激勵兵勇併

力截擊以期迅殄賊氛所有出力之守備程智泉著賞給都司銜

並賞戴藍翎勇目吳濟美黃正吉均著以千總遇缺卽補謝賢達
著賞戴藍翎馮富著以把總補用並賞戴藍翎程步龍陳松均著
以把總補用李釗著以外委卽補嚴國英楊德新梁榮盧鵬超陳
月明章雄德均著賞戴藍翎韋貴著以外委補用已革壽春鎮總
兵王山督兵接仗身受多傷殞命從優著照總兵陣亡例賜卹西
安帶兵官伊昌阿柯登額當玉山陣亡後遽行逃去經張印塘阻
止不肯少畱見在尙無下落實屬可惡著江忠源查明該二員逃
避情形卽行正法○諭給事中賈世行奏山西捐輸請盡裁浮費
等語山西各屬捐輸頗爲踴躍惟各該州縣因銀樣不齊成色不
足飭令加耗補平以致各捐生觀望不前見當籌備經費之時宜
如何體恤民情設法勸諭以濟要需若如該給事中所奏地方官
任意取盈吏胥從中需索鑪局藉此勒捐種種弊端不可枚舉山

西一省如此他省可知嗣後各直省辦理捐輸著各該督撫嚴飭各州縣盡裁浮費隨繳隨收陸續報解所有火耗補平各名目悉行禁革儻有不肖州縣婪取肥己任聽書役勒索擾累或將收捐銀兩並不隨時報解任意開銷一經告發或被科道糾參除該地方官按律治罪外該督撫藩司一併嚴懲不貸懷之○諭軍機大臣等勝保奏趕築礮臺移營逼近賊壘等情並繪圖貼說披覽均悉逆匪占踞獨流靜海已逾兩月此股一日不除畿輔一日不安况揚州賊援麇至見已全股竄赴瓜州揚城雖已收復而賊勢愈張設使大股北竄則淮徐山東一帶更將滋蔓難圖該大臣等務當趁此賊勢窮蹙之時趕緊進攻勿稍延玩至解散脅從尤須加意慎重若如勝保告示所云臨陣棄械道旁長跪即可免死資遣毫無稽察設被奸匪洩出豈不又墮奸計耶另片奏請飭僧格林

沁移兵進紮第六府本日已諭令僧格林沁酌度情形刻卽移營前進會同勝保相機夾攻該大臣與僧格林沁共辦一事務須合力同心剋期進剿迅殄醜類若稍分畛域彼此不相援應以致賊匪竄逸僧格林沁勝保均難辭咎所請餉銀已諭令桂良迅速撥解矣將此由六百里加緊諭知勝保並諭德勒克色楞知之○諭勝保奏請飭僧格林沁酌度地方移兵前進扼紮第六府防西北要路等語勝保連日移營逼近賊壘建築礮臺逆匪屢次搶撲均被擊退見飭各路嚴防惟兵勇分撥堵築仍恐力單據稱第六府地方爲獨流西北要路若有重兵防守聲勢更壯朕思僧格林沁旣須帶兵前進不徒防守一隅總以合力進攻爲要該大臣接奉此旨著卽相度地勢情形移兵前進與勝保併力攻剿以期一鼓殲除斷不可令賊匪竄逸本日據琦善等奏揚州賊匪全股由東

路竄赴瓜州揚城雖已收復而匪黨仍復肆擾若不將畿輔趕緊肅清致逆匪北竄句結勦辦更難得手僧格林沁與勝保共辦一事務當同心合力迅速奏功該大臣忠勇素著必能統籌全局用副委任勉之勝保原片著鈔給閱看將此由六百里加緊諭令知之○諭琦善陳金綬奏揚城內外賊匪全股竄赴瓜州一摺覽奏曷勝憤急已明降諭旨將琦善等革職責令戴罪自效並將馮景尼張翊國分別治罪矣琦善統帶大兵攻勦揚州逆匪老師糜餉日久無功陳金綬以幫辦大員亦復毫無表見朕前謂琦善待賊盡竄收復空城今竟不出所料猶自謂功敗垂成無恥已極琦善陳金綬與雷以誠慧成共辦一事乃始終不能和衷共濟各分畛域以致賊匪乘間全股竄逸均難辭罪晉康查文經見退至灣頭該員等畏葸無能亦可概見見在賊踞瓜州儀徵兩處江口若不

東竄通泰一帶勢必折回北竄昨有旨令陳金綬帶兵直趨揚州
東北駐紮此時賊已退出揚城卽當督兵前進自北而南扼要堵
截無論東西兩路如有賊匪回竄擾及揚州上游必將琦善等盡
置重典決不寬宥懷之將此由六百里加緊諭知琦善並諭令陳
金綬雷以誠慧成等知之○賞直隸軍營各征兵一月錢糧○乙
亥諭軍機大臣等向榮自抵金陵以來實在與賊接仗僅止鍾山
七橋竄兩次嗣後疊次奏報非言攻城之難卽鋪張進攻之法從
未見一真實勝仗近來所奏事事敷衍如賊竄高淳則鋪敘德安
勝仗賊自鎮江出撲則鋪敘余萬清勝仗而於金陵賊巢絕不設
法進攻但稱鑄造大礮張射告示欲以虛聲勝賊試思逆賊負隅
堅守如此猖獗豈虛聲所能制勝見在瓜州儀徵大股逆匪分撲
揚州將揚城之賊全數引出沿江賊踪絡繹廬州被賊圍撲勢亦

危急如果向榮能急攻金陵傾賊巢穴該逆豈能四出滋擾前據琦善奏據向榮來函已有探聞賊匪欲從瓜儀分道援揚之語向榮既有所聞何以不急攻金陵掣賊後路徒以書札相貽聽江北之自爲布置是誠何心揚城逆賊全竄罪在琦善而救援之賊絕無後顧之憂誰之罪耶今逆賊盤踞瓜州分竄皖楚金陵存城之賊想已無多前此孫銘恩袁甲三所奏情形均已論知向榮查明迅速籌辦卽據向榮前次所奏亦稱城內廣西真賊不過千餘湖南死黨亦不過五六千人若不設法迅圖克復雖鑄成數萬斤大礮將何所用豈亦欲效琦善之聽賊自竄收復空城然後自請治罪耶以見在情形而論揚州之賊久則必竄金陵之賊斷無自竄之理向榮株守紫金山自謂東南屏蔽不知果能奮力進攻賊必懼而返顧不但南不能竄蘇常北亦何能肆擾此人人共知之理

向榮豈不知之總由驕滑之習橫結於中不知悛改殊堪痛憾向榮接奉此旨若再不迅速進攻仍前遷延觀望國法具在必當立置重典斷不能以東南暫保無事遂從寬宥也其如何進攻情形仍著迅速奏報鎮江賊情尤爲窮蹙何以但事堵禦並不攻剿孫銘恩所奏川兵逃潰情形極爲悖悞何以不能妥爲約束均著據實具奏不准虛詞搪塞正在寄諭間復接向榮二十五日奏報所稱接仗情形仍未盡實已於摺內詳晰批示矣將此由六百里加緊諭令知之○湖廣總督吳文鎔奏臣前於九月十五日接印十六日撫臣崇綸卽至臣署告云見在城內居民遷避一空勢難堅守不如紮營城外尙可一戰等語臣心不以爲然惟臣甫到兩日一切情形未悉安敢膠執已見遂定稟入奏當時臣曾對眾人云

加

八月

援兵四集可以制勝自可出城紮營儻三五日內

援兵未集而賊船已至仍是閉城堅守不得以既有此奏遂棄城
不顧也詎十八日丑刻賊船離城不過三十里臣趕請撫臣及文
武各員來署商量守城之計乃遲至天明並無一人至者臣卽騎
馬馳往撫署中途聞撫臣及文武行卽出城紮營臣聞之心膽俱
裂卽趨至撫署告以此時惟有閉城堅守斷無出城紮營之理撫
臣猶曉曉爭辯謂守此空城何用指臣爲止知博取死節美名不
顧屢喪大臣有傷國體臣始恍然於撫臣之必欲出城紮營者意
將乘機逃避藉口於本在城外可免失陷城池之罪耳臣當云此
時惟有城存與存城亡與亡如敢有異議者臣先手刃此人眾議
始息撫臣亦無可如何始定登陴堅守之計撫臣雖駐守城上遇
事均與臣齟齬卽如荊州將軍台湧旣撤兵回營荊州亦關緊要
撫臣必欲調之來省臣再三阻之撫臣遂不與臣謀徑發咨函促

台湧來省並捏稱已調綠營精兵七八千人向巴河剿賊以影響
全無之事形之公牘視軍務爲兒戲臣實不勝悚懼又如見在賊
聚黃州自應酌撥兵勇由陸路偵蹤伺剿水路則船礮未齊水勇
未集止可姑待再舉而撫臣必欲此時雇民船數百號撥兵五六
千水陸並進並未思及見在防城之兵既勻不出五六千人而民
船舵工水手一間與賊打仗均必紛紛退避臨時必至誤事臣再
三勸阻大拂其意以致見在應辦應奏之事撫臣不肯列銜當茲
賊寇在境臣方虛衷息氣事事期與共濟其不可行不能行之事
臣斷不敢違心苟同而撫臣堅僻自是一城之中彼此各辦各事
設有貽誤咎將誰執展轉愁思不敢不據實直陳於君父之前
至臣才識迂疏軍旅之事更所未嫻何敢自以爲是謂所行克當
惟有仰懇天恩將臣立賜罷斥另簡重臣來楚或先令撫臣兼攝

督篆以期事歸畫一任有責成不至貽誤封疆 上諭前據崇綸

奏稱吳文鎔止知閉城坐守等語卽知該督撫不能和衷商辦公
事當經嚴飭吳文鎔崇綸務須同心合力迅圖剿辦茲復據吳文
鎔憑陳崇綸與該督齟齬各情形並請立賜罷斥尤屬膽大妄言
荒謬之至該督撫均係朕特簡大員試思時勢何等急迫乃敢各
執己見置國事於不問此等疆吏卽立予刑誅亦復何惜吳文鎔
與崇綸厥罪維均殊堪痛憾值此軍務緊急若再不以防剿爲重
國法豈能倖逃著吳文鎔仍遵前旨迅速統帶官兵出省迎剿不
准稍涉耽延崇綸仍著專辦省城內外防守事宜儻因布置未周
堵禦不力致有疏虞惟崇綸是問若進剿有誤機宜惟吳文鎔是
問決不寬宥懍之將此由六百里加緊諭令知之○諭見在賊匪
竄擾黃州一帶已令吳文鎔帶兵出省剿辦武昌重地防守緊要

本日有旨令台湧兼程馳赴德安接辦防剿事務青麐俟台湧到德安接辦後卽著趕赴武昌籌辦防堵事宜並將抵省日期迅速由馳驛報毋稍延緩將此由六百里加緊諭令知之○諭前曾諭令吳文鎔出省勦辦黃州一帶賊匪本日復催令前進並命青麐前赴武昌省城見在德安一帶並無大員駐守著台湧於接奉此旨後卽刻兼程馳往德安接辦防堵事宜以便青麐啟程赴省德安等處近鄰河南江面賊踪尙未掃除淨盡該逆詭計多端必須刻刻防其北竄該將軍兼署提督所有江北水陸各路均著督率地方文武認真嚴防其上游荆襄各屬並應嚴密堵禦隨時稽查毋令賊蹤闌入荊州駐防官兵卽著官文貴陞統帶防守該將軍行抵德安日期迅卽具奏毋稍延緩將此由六百里加緊諭知台湧並諭官文貴陞知之○諭據王懿德奏粵艇遭風折回兩幫共

有十餘隻實形損壞其作法非閩匠所諳必須回粵修理再由粵省駛赴江南等語著葉名琛柏貴於該艇船回粵後卽飭查明損壞之處將各船緊要器具趕緊修理務須堅固完好一俟交春東南風轉卽派管駕之員剋期駛赴江南以備金陵鎮江攻剿之用萬不可再有耽延致滋貽誤將此由六百里加緊各諭令知之○雷以誠等奏揚州逆匪竄出南門郡城已復得旨圍攻半載有餘之賊一旦竄出成何事體尙如是鋪張無恥已極粉飾入奏已屬有意掩飾若被賊聞豈不成一大笑話琦善業經入奏已有旨又批有何可慰幸汝等面皮厚方能出此○吳文鎔奏參已革總兵官楊昌泗退兵回省請發往軍臺效力得旨楊昌泗雖迹涉退避參之固當唐樹義夜遁黃州何不嚴參亦未聞論及此何時也尙存一室文輕武之心爾輩有此習者卽立正典刑不足蔽辜又奏

撫臣崇綸堅辭自是將來恐有貽誤請另簡重臣以期事歸畫一
批汝二人厥罪維均負氣詭辭無恥已極膽大已極○向榮奏金
陵等備進攻事宜並鎮江水陸獲勝情形得旨朕看未必盡實不
過因攻打情形多日未奏藉此敷衍然擣穴擊虛亦是善法第恐
徒勞無功向榮嗣後或勝或敗必將實在情節敘出朕雖未曾與
汝謀面汝之肺腑朕已早見料汝亦斷不敢視朕如賽尙阿一派
請張爲了事也○以杜翰爲內閣學士由右庶子遷○以湖北退軍回
省已革總兵官楊昌泗發軍臺效力按察使唐樹義革職畱任○
予山西傷亡協領巴揚阿祭葬世職○丙子以文彩爲左副都御
史由通政使遷○丁丑曾國藩奏臣接奉諭旨令挑選練勇雇覓船隻
順流東下與江忠源水陸夾擊臣查自田家鎮失防以來督臣吳
文鎔撫臣駱秉章與臣往返函商至十餘次皆言各省分防糜餉

多而兵力薄不如數省合防糜餉少而力較厚卽與張芾江忠源
函商亦言四省合防之道兼籌以剿爲堵之策臣前月覆奏一摺
曾言舟師辦有頭緒卽由臣親自統帶駛赴下游是未奉此次諭
旨之前臣之志已思率師東下一紓積憤矣惟礮船一件實有不
宜草率從事者臣前發摺後卽鳩工購材試行造辦造成樣船數
隻皆以工匠太生規模太小不足以壓長江之浪不足以勝巨礮
之震近由撫臣處送到水師守備成各標一員又由督撫臣處咨
到廣東續來之挖苦快礮船式二種始細加講求照快礮之式重
新製造見已先造十號更須添造二三十號計必中宮能載千餘
斤之礮兩旁能載數百斤之礮乃足以壯軍威而摧逆賊惟新造
之舟百物未備雖日夜趕辦亦難遽就必須一月以外乃可下河
至價買舊船修改艙面其用力稍省其爲日自少然至二三百號

之多亦須一月餘之久至挖罟船隻本奉諭旨令兩湖督撫照式製造者武昌見在照造未知合用與否衡州匠少技拙見在尙未試造前經奉旨特派之廣西右江道張敬修帶有工匠自粵來楚若到湘尙早臣當令其趕辦如到湘太遲亦不能以勢難遽成之挖罟延刻不可緩之時日此辦船之大略也至於礮位一項見在衡州存礮無幾聞張敬修購辦洋礮廣礮千尊由韶州一帶來楚臣專候此項礮位前來乃足以資配放至於募勇一事前臣添勇六千之信係爲江忠源尙守江西言之也旋奉帶勇六千之旨係爲臣救援湖北言之也厥後武昌解嚴臣奏明暫不赴鄂因飭江忠源之胞弟忠淑先帶楚勇千人赴皖其餘五千之數因舟師尙未辦齊故陸勇亦未發往臣接奉此旨陸勇已屬整備而水勇尙無章程計張敬修帶來之礮勇與湖南新募之水手亦須湊成四

千人乃可自成一隊水陸兩軍合之則兩相夾擊分之則各能自立庶不至一遇大股卽被衝散統計船礮水勇三者皆非一月所能辦就必須明春乃可成行且廣東購備之礮張敬修雇募之勇皆係奉肅清江面之旨而來者臣若不督帶同行殊失聖主命
臣統籌全局之意亦非臣與吳文鎔等四省合防之心臣之斟酌遲速規畫大局不得不一一縷陳得旨見在安省待援甚急若必偏執己見則太覺遲緩朕知汝尙能激發天良故特命汝赴援以濟然眉今觀汝奏直以數省軍務一身克當試問汝之才力能乎否乎平時漫自矜詡以爲無出己之右者及至臨事果能盡符其言甚好若稍涉張皇不貽笑於天下耶著設法趕緊赴援能早一步卽得一步之益汝能自擔重任迥非畏葸者比言出諸汝口必須盡如所言辦與朕看又奏請將湖南本年漕米提用二三萬石

以濟軍餉批用之於軍需不爲浪費尤須迅速咨部勿稍含混○江忠源奏上月二十三日該逆環攻郡城槍礮如雨經兵勇奮力抵禦自戌至丑賊始敗退昏黑之中不知斃賊多少二十四五六等日疊有斬擒二十六日夜聞該逆乘夜偷過城濠逼近城根各紮營一座以爲開挖地道之計五更月上我兵始行看出當卽督飭部司馬良勳等帶領開化勇本地勇於水西門月城穴牆而出直撲賊營並令臣自湖北帶來之親隨楚勇四十名帶同本地練勇從紫金埂縋城而下牽制大西門一帶賊匪馬良勳等帶兵撲近賊營各勇奮不顧身逼近牆根拋擲火彈該逆驚亂各勇乘勢一面將營牆拆毀一面奮力攻擊斬獲長髮賊首級一顆擊斃賊五六十名該逆敗入濠外高坡營內大西門及紫金埂一帶賊營果出隊前來救應經楚勇頭目鄧善珍等督率眾勇橫出圍截鏖

戰一時之久賊抵敵不住各勇乘勢燒毀賊營一座約斃賊匪六七
七十名又令程智泉帶領廣勇從小東門穴牆而出攻奪賊營斃
賊二三十名是日燒毀賊新營二座舊營一座各處共斃賊匪一
百五六十名馬良勳頭目肩上均受微傷惟得勝門外新營尙未
焚毀深爲可慮是夜令把總尙得勝帶領六安勇乘夜縋城而下
傍城紮營至二十八日黎明營盤甫成該逆數千人蠶擁而至尙
得勝督令眾勇在營內施放槍礮都司楊煥章督率川兵及本地
勇在城上施放槍礮賊勢雖猛近城卽斃臣復調楚勇帶同六安
勇從大西門前往接應楊煥章見賊勢跳躍將近兩時其氣已竭
督令兵勇下城尙得勝亦督勇出營奮力攻擊再接再厲該逆抵
敵不住大敗逃奔我兵乘勢追殺斃賊百數十名生擒十九名焚
燒賊新營一座舊營四座尙得勝徧身受火罐傷午正收隊入城

楚勇六安勇至大西門該逆點發地雷轟倒大西門月城十丈六尺該逆盡擁而上經湖南舉人鄒漢勛身先士卒帶領楚勇開化勇四川兵六安勇奮力抵禦將賊擊退追出缺口外抵住賊匪趕用沙袋石塊修築約有五六尺高始將城外兵勇撤進至酉正修築完整高與城齊斃賊五六十名當賊匪攻撲得勝門時復分股攻撲南門小東門均經擊退斃賊數十名是日該逆以大股猛攻得勝門復分股力攻南門小東門兼用地雷轟倒大西門月城勢甚危險仰賴 聖主威福各處均獲勝仗並將地雷轟塌之處登時搶護化險爲平是夜該逆復於水西門外偷過濠溝紮營二座二十九日黎明仍令馬良勳徐懷義帶領開化勇本地勇縋城而出奮力攻撲各勇逼近賊營該逆拌死來爭各勇亦拌死抵禦自卯至酉約斃賊匪二三十名是日賊匪攻撲小東門紫金埂各處

小東門之賊被程智泉督率廣勇擊退斃賊十餘名紫金埂之賊經楚勇帶同本地勇擊退並下城追擊斃賊二十餘名臣接陝甘總督臣舒興阿來函知已帶兵於十五六日自陳州啟程前來救援又得已革臬司張印塘來稟在店埠收集玉山殘敗兵勇六百餘名又新招江南大營遣散之川勇一千名並與編修李鴻章招集各鄉團練見在趕辦鍋帳器具一俟齊備卽當進逼城下又探知音德布於十一月十九日與賊接仗未能得手見已紮城西二十里外臣業經分別咨行催令速進惟查城外賊營四面林立各路援兵能否直達城下尙難豫定奏入上嘉之○戊寅諭軍機大臣等僧格林沁奏第六府地面狹窄實難紮營等語僧格林沁著仍駐紮王慶坨扼要堵剿見在獨流逆匪經大兵攻剿勢已窮蹙自以防其乘虛北竄爲要據該大臣體查情形仍須駐紮王慶

地以備策應卽當嚴飭副都統伊勒東阿那敷德副將史榮椿等嚴密防範見值天寒冰結尤應晝夜巡查不可稍涉大意該大臣統領重兵爲京師屏障責任綦重想已統籌全局布置周妥設有疏虞惟該大臣是問懷之將此由六百里加緊諭令知之○諭本日據僧格林沁奏查看第六府地面狹窄實難安營馬隊亦無處屯紮如賊北竄又成尾追之勢等語自係實在情形已諭令僧格林沁仍駐紮王慶坨責成專防後路矣勝保勦辦獨流逆匪已逾兩月尙未能掃穴擒渠實屬延緩近日移營前進逼近賊壘建築礮臺晝夜環攻自應得手惟連日未見奏報殊深懸繫該逆雖堅匿不出亦須設法轟擊分路進攻或誘令出巢設伏截擊豈可任賊負隅疲我兵力遷延時日迄無成功見在防禦後路旣專責僧格林沁進剿賊巢勝保亦責無旁貸著卽督率帶兵各員剋日進

攻好得藉詞推諉致干重罪至靜海城內賊匪近日情形及西凌
阿善祿刻下如何攻剿之處並著該大臣據實具奏將此由六百
里加緊諭令知之○諭前因皖省需餉甚急當諭令張亮基迅速
籌撥旋據該撫奏稱撥銀五萬兩派員解赴廬州昨據江忠源奏
城內軍餉告竭難支數十日之用等語朕心甚爲焦急見在賊匪
攻撲廬郡守禦萬分緊要若軍餉稍有缺乏貽誤非輕著張亮基
於山東省中無論何款再行籌撥銀數萬兩迅派委員解赴皖省
以資接濟不得以無款可籌一奏了事並將前已起解之款飛催
沿途妥速護送仍知照舒興阿和春等遴委得力弁兵前來迎提
務期剋日解至廬州毋稍延誤將此由六百里加緊諭令知之○
添派內閣學士杜翰辦理巡防事宜○己卯諭內閣勝保奏請畱
革員暫辦糧臺等語已革直隸藩司張集馨係應行發遣之員前

因勝保奏請暫畱帶勇防剿始准所請何得復請辦理糧臺竟使該革員置身安閒之地冀爲異日邀恩起見所請著不准行仍著勝保嚴行察看如該革員於帶勇剿賊不能得力卽著遵照前旨迅速發遣不得再行瀆請所有勝保軍營糧臺著桂良速派廉幹道府大員前往接辦毋稍遲誤○諭勝保奏攻剿逆匪大獲勝仗一摺本月初六日勝保調撥官兵分布西南北三面同時進攻該逆從西岸分撲松玉等營盤我兵分兩翼迎擊逆眾敗退入壘旋復傾巢衝出勝保親督兵勇爭先衝殺立斃騎馬賊三四十名賊眾自相踐踏登時大潰統計是日殺賊七八百名賊勢窮蹙已極著勝保卽行督率各路將士激勵兵勇迅速攻剿務將賊壘剋日掃除盡殲醜類不准稍畱餘孽並飭西凌阿善祿由靜海南面節節進逼併力合攻以防竄逸所有此次打仗出力各員并著准其

酌量保奏候朕施恩○諭御史孟洋奏請飭各省嚴緝土匪一摺
土匪藉端滋擾原應嚴拏懲辦以靖地方卽如近日直隸通州灤
州寶坻玉田等州縣梟匪劫奪經科道參奏已疊降諭旨飭令嚴
行查緝該御史奏請通飭各省嚴緝土匪並未指明一案徒託空
言該員由部曹擢任御史自應建白國事朕覽此奏不過因新升
臺諫撫拾外省食言苟且塞責若皆似此敷衍甚非朕虛衷求言
本意也從前嘉慶年間屢降諭旨各御史遇有科缺及各項差
使前期數日必有建白以冀上知其名近來風氣似此頗多著傳
知各科道不准勦襲陳言以爲上進地步凡有建白必須據事直
陳勿稍徇隱莫先存沽直之心莫豫期傳誦之美朕實有厚望焉
○諭軍機大臣等勝保奏初六日擊賊獲勝一摺該逆負隅已久
疊經嚴諭催令勝保速速進攻及早肅清畿輔以紓朕念此次奏

報各情兇勦尙屬得手惟靜海獨流之間賊匪時時句結救援使我兵腹背受敵必須斷其接應攻勦方能得力所稱橫紫營盤它斷往來隄埂絕賊救援之處卽著嚴密籌辦此外有無良策使逆黨首尾不能相顧亟應隨時體察機宜豫爲布置見在賊勢窮蹙已極各路官兵不爲不厚該大臣務須激勵將士勦力同心剋日掃穴擒渠毋再遷延貽誤至達洪阿以帶兵大員前因輕進失機降旨革職查封家產見旣據勝保奏稱該革員頗知愧悔朕念達洪阿素有勇氣著勝保傳旨訓勉果能奮勇立功不但赦其旣往之罪仍可再邀恩眷也將此由六百里加緊諭知勝保並諭德勒克色楞知之○山東學政徐樹銘奏濟甯州民被水災請飭河督乘水涸時興工辦理得旨汝此奏何不度時勢若是朕豈忍置災黎於不問第是時何暇顧及又批何用駢體殊屬未諳體制亦可

厭之至○予廣西陣亡縣丞李鈺祭葬世職○庚辰諭內閣前以天津縣知縣謝子澄勦賊被害業經降旨優加賜卹並賞給騎都尉世職著勝保查明應襲之人迅速具奏俾得及早襲職謝子澄子弟如有堪以帶勇者卽令赴軍營聽候差委再朕聞謝子澄被害時有勇目余姓竭力救援同時殉難並著勝保查明准將該勇目附祀謝子澄專祠以彰義烈○撥廣西常平倉穀支放兵米○辛巳諭內閣王懿德奏克復仙遊縣城一招福建逆匪林俊於本年八月竄踞仙遊該縣土賊乘亂蜂起與該逆互爲聲援經該撫諭令在籍武進士劉逢泰親詣各鄉密約鄉耆約束解散該逆勢孤潛有遁志當飭副將呂大陸從閒道疾趨探聞林逆先已逃至晉江南安交界之雲峯等鄉並有黑白旗匪黨在中途設伏欲圖攔截官兵呂大陸揮眾直前乘夜掩殺斃賊無算卽於十一月十

七日將仙遊縣城克復辦理尙屬迅速除副將呂大陸本日另行降旨加恩外王懿德前因勦匪遷延交部嚴加議處並將李廷鈺交部議處此次督辦有方均著加恩開復處分署海壇鎮總兵鍾寶三經該撫派令與呂大陸會合夾攻乃竟遲疑觀望致令首逆林俊乘間脫逃實難辭咎著先行摘去頂帶責令會同呂大陸迅速帶兵直擣賊巢將該逆首從各犯悉數殲擒以贖前愆儻再貽誤卽著從嚴懲辦○琦善陳金綬奏慧成自到揚以來住居灣頭船上擁兵自衛從未親臨戰陣見除收回潰勇不計外其所帶之兵共有一千四百七十名皆在灣頭臣琦善以目下揚城無賊尤宜重扼東南因咨會慧成移營前進以防揚城東面詎意慧成並不咨商亦不前進徑調防守便益門之總兵多隆武帶勇四百名移紮五里廟狼山營兵三百名移紮沙河橋臣查該總兵多隆武

等駐兵便益門外本屬不可移動又非久經行陣之兵萬不足恃
慧成向於撤兵調兵重務並不向臣琦善咨商以致賊至勇散無
從先期調度至剿捕逆匪事權須一前此十一月十一日約定慧
成福濟派勇赴三汊河協剿行至中途被福濟令箭截回亦未向
臣知會軍務各自任性焉能協力同心加以帶兵各大員往往意
存諱飾工於取巧晉康查文經防堵徐凝鈔關兩門所有師長鑣
等各營之勇悉聽其檄調迨瓜州之賊竄過施家橋楊子橋兩路
師長鑣營勇已潰正應竭力堵禦乃晉康卽退至灣頭查文經又
經慧成調回致內外賊匪聯爲一片其咎宜有所歸雷以誠慧成
奏揚城餘匪雖竄而附城數十里內賊營尙未全撤恐其以退爲
進乘虛北竄見在灣頭僅存兵一千數百名間有未散之勇亦斷
不可恃查灣頭爲四通八達之區水陸兩路均可上窺清淮臣等

扼守灣頭實爲力爭上游之計茲據琦善移稱東路以楊子橋寶塔灣監捕教場爲藩籬令臣慧成移營前進分布是撤北路之屏蔽也設賊竟長驅而窺清淮勢將不可復問查琦善見統重兵九千餘名與其擁以自衛置有用之兵於無用不若分布各路以顧大局而防北竄所有琦善請撤灣頭大營分布東路之處萬不可行上諭軍機大臣等據雷以誠慧成奏琦善請移灣頭大營分布東路萬不可行復據琦善陳金綬奏收復揚城後防剿事宜並查明東路帶兵大員諱飾取巧各一招朕閱該大臣等所奏各情仍是各挾私意諉過於人試思琦善統領諸軍各路帶兵大員均歸節制東路勇潰雷以誠慧成固屬罪無可辭琦善又豈能坐觀成敗徒以一參了事以爲卸罪地步雷以誠所築礮臺無礮無兵各營礮位無人收管慧成悉將各營兵丁撤回退保灣頭似此畏

憊無能一籌莫展殊深痛憾見在瓜州賊船千餘隻尙未開行究竟欲竄往何處該大臣如何進攻如何堵截全未籌及惟知與雷以誠等互相詆毀竟置大局於不顧是誠何心前有旨令陳金綬徑赴揚州東北一帶扼要駐紮該大臣營中帶兵得力者尙不乏人著卽飭令陳金綬迅卽帶兵前進嚴防揚城東面並追剿瓜州等處賊匪慧成所帶兵僅一千餘名卽使移營前進亦豈能如陳金綬之奮勇擊賊若明知慧成不能禦賊而令其孤軍前進設有貽誤罪將誰歸逆匪詭譎異常揚城雖已退出難保不乘閒復圖北竄著琦善卽嚴飭雷以誠慧成等扼守萬福橋灣頭一帶要隘並非令其株守一隅亦須隨時相機接應儻雷以誠慧成等藉此遠退不加奮勉卽著該大臣秉公嚴參朕必治以重罪琦善係欽差大臣陳金綬亦係幫辦大員均屬責無旁貸若但知擁兵自衛

不顧全局儻致逆匪北竄國法豈能再逃懷之將此由六百里加
緊諭知琦善並諭陳金綬雷以誠慧成知之○以克復廈門出力
賞副將呂大陸巴圖魯名號○壬午諭內閣德勒克多爾濟等奏
迎接哲布尊丹巴呼圖克圖之呼畢勒罕請旨照五世所用白布
圍牆紅色車轎或照六世所用黃布圍牆黃色車轎等語前世哲
布尊丹巴呼圖克圖乃累世推廣黃教護持蒙古而又喀爾喀四
部落共奉之呼圖克圖也加恩迎接今世之哲布尊丹巴呼圖克
圖呼畢勒罕著准其沿途卽用黃布圍牆黃色車轎至伊所用黃
織藍旗亦著照常需用○以潘曾瑩爲吏部右侍郎由內閣學士遷○癸
未諭內閣前據張芾奏保江西守城出力人員朕以其所保過優
且其中有失守屬境城池之員功罪不容相掩當交該部覈議具
奏該撫自應聽候續降諭旨懍遵辦理乃於未接部文之先輒卽

曉曉置辯直似該撫所保竟無一員可從覈減者試思各省出力人員無論守城接仗朕未嘗稍靳恩施卽以江西而論隨時加恩者亦復不少此次交部覈議原爲確覈功過並非概行不准該撫何由知部議之必從駁斥而爲此急切冒昧之詞該撫捫心自問此文武各官二百餘員中果竟無一人冒濫耶賞當其功罰當其罪自能人人用命若但以濫保爲激勵之方見好官紳不肯稍任勞怨於保舉屬員不憚爲再三之瀆而於奉旨查辦之員如帶兵畏蒞之守備岳殿卿等則至今未據覆奏舉劾如此何以服眾此等疆吏朕實爲之汗顏至該省紳士實在守城出力者業經分別加恩其餘聞警遷避之員不加究辦已屬從寬該撫乃稱仍俟酌量請獎以昭激勵既經參奏於前又復回護於後自相矛盾尤屬紕謬張芾著傳旨申飭所有守城出力文武員弁著仍遵前旨確

查功過另行酌覈保奏不得再行瀆請○諭穆騰額諄齡奏審明呼圖克圖等供詞分別定擬一摺前因第穆呼圖克圖阿旺羅布藏吉克美嘉木參不守清規經呼徵阿齊圖呼圖克圖查明拏稟當降旨交穆騰額等親提研訊茲據該大臣等審訊明確分別定擬錄供呈覽該呼圖克圖任性妄爲有玷黃教其管事扎薩克喇嘛工噶嘉木白隱匿不報均屬罪有應得除所得呼圖克圖及扎薩克名號前經降旨撤退外著照所擬即將阿旺羅布藏吉克美嘉木參發往宗喀地方並將工噶嘉木白發往瓊結地方均交該營官永遠管束不准出外滋事至前輩第穆呼圖克圖著有勞績既據達賴喇嘛代爲籲懇俟見在第穆身故後准其轉世著加恩卽允所請以順眾情○諭穆騰額等奏班禪額爾德尼涅槃後修理金塔寺工程將及完竣等語班禪額爾德尼係後藏呼圖克圖

喇嘛之總師長喇嘛深通經藝與揚黃教今伊徒眾將金塔寺修理妥協於十一月二十五日將舍利奉入於金塔寶爲吉祥之事朕心實爲快悅著賞給白哈達一幅念珠一串以副朕懷想有功之至意○諭軍機大臣等寄諭參贊大臣僧格林沁據順天府奏隨營糧臺詳稱軍營搭放官票寶鈔諸多窒礙另請酌發見銀大錢一摺鈔票甫經頒發商賈藉以流通且出納均以五成尤爲便民善策前經賞給八旗守兵征兵與直境隨征兵丁一月鈔票錢糧正欲令其通行無滯據稱糧臺道員定保以王慶坨地方並無銀錢大鋪且附近之武清東安一帶亦從未試行軍營難以搭放經該大臣札令該道徑詳順天府覈辦該兼尹府尹並未咨查輒據糧臺一面之詞遂定爲實在情形顯係畏難不辦置大局於不顧朕意該大臣於度支竭蹶情形素所深悉當此新章初定自必

力求變通設法施行況與銀錢相間搭放大營各官員應領款項甚多豈不可酌量支發鈔票行與不行轉機在此見方通飭各直省一律遵辦斷不能因該糧臺首倡窒礙之說致各處兵丁有所藉口著該大臣嚴飭糧臺各員酌度情形妥籌搭發毋得率聽該員等模糊影響之談因噎廢食也將此諭令知之○諭翁心存等奏軍營搭放鈔票窒礙情形一摺官票寶鈔之興原以濟銀錢之不足見當章程甫定正期中外大臣力求變通設法推行順天爲首善之區尤宜倡率遵辦以爲各省之式且出納皆以五成爲限民間完繳正項錢糧與鹽關課稅及一切交官等款皆須鈔票與銀錢相輔而行前降諭旨甚明民間宜無不周知方且購求鈔票以爲交課之用尙何窒礙之有該兼尹等率據糧臺道員詳文謂須先由地方試行有驗方可行使是先存一試行無驗之心爲此

阻撓之說並未將如何流通一爲籌及直甘心置鈔票於不用是何居心該兼尹府尹輕聽該道之詞意存見好屬員率請撥給見銀制錢豈戶工兩局見鑄大錢日不暇給與庫項空虛該兼尹等竟茫無所知卽謂兵丁行使初尙未便而隨營官員應領款項甚多豈亦難搭放是直畏難不辦竟置大局於不顧至該員定保詳稱係奉參贊大臣札令徑詳覈辦該兼尹等亦不復咨查是否確實遽信爲實在情形尤不可解想僧格林沁公忠體國不當如是也所有應行次第施用鈔票之處卽著該兼尹等妥速籌商俾無阻滯將此諭令知之○免江西陣亡知府王本梧因公那用地丁銀○甲申諭軍機大臣等前據琦善奏張翊國棄施家橋而不守當經降旨將該弁發往新疆矣茲據雷以誠奏稱張翊國等於本月初五日攻打施家橋燒毀逆匪土城追斬無算是否係雷以誠

飾詞入奏爲張翊國希冀免罪地步抑係張翊國實有出力之處著琦善秉公確查據實具奏原片著鈔給閱看將此由六百里諭令知之○諭前因有人奏廣西臬司許祥光剿匪冒功知縣蔡映符陷賊偷生降旨令葉名琛查明具奏茲據龍啟瑞奏勞崇光欺飾釀患民生塗炭一摺廣西羣盜如毛疊經該撫憑陳辦理棘手情形但總未埽除淨盡朕心實深軫念惟冀地方大吏力求振作紳士等志切同仇與官兵齊心合力隨處堵剿庶可漸次肅清茲閱龍啟瑞所奏顯係官紳不和於通省剿賊事宜殊有關係且該學士片奏省城無兵無餉勢處萬難若不將該省賊匪早籌蕩滌其勢何以久支所稱各郡縣盜風日熾撫臣偷安養重臬司並不由省剿捕各情葉名琛確切查明據實奏聞將此由六百里諭令知之尋奏見聞廣西非僅官紳不和巡撫與兩司不和藩司與臬

司又不和羣屬下僚無所表率至廣西糜爛情形日甚一日惟有通盤籌計加意圖維報聞○湖廣總督吳文鎔奏自賊船下竄以來因水路船礮未齊水勇水手亦未募足止能酌量撥兵由陸路設法攻擊不克水陸並進是以一面與撫臣崇綸商催造船鑄礮選募水勇一面與前任禮部侍郎臣曾國藩往返函商屬曾國藩在衡州府亦趕緊改造船隻雇練水勇約於正月間統帶舟師由南至北與臣會合前進無論賊船在楚在皖總必極力窮追痛加剿洗以期一鼓殄滅此臣曾國藩所云合四省之力掃此賊氛即臣與曾國藩籌剿之大略也臣賦性迂拙事期踏實因籌剿各事宜正在辦理尙未就緒不敢先事鋪張撫臣崇綸遽欲以雇船派兵懸虛未集之事遂爲力籌剿賊經臣再三勸阻以致不肯會銜奏事茲欽奉諭旨因田鎮既有賊營巴河尙有賊船分踞黃州之

賊亦復不少命臣親督官軍出省督戰不准守候船礮造齊致滋延誤查見在黃州以下均有賊蹤而切近省城以黃州爲緊要臣謹遵旨親督官軍趕緊渡江馳赴黃州一帶相機督戰先將黃州之賊剿除節節跟追以期肅清楚境彼時如北省船礮兵勇備齊曾國藩統帶舟師陸勇由南省前來仍可水陸並進掃蕩妖氛報聞又奏見在臣遵旨帶兵出省督戰撫臣崇綸欲臣暫且不必出省謂防剿必須兼顧臣兼權熟計見帶兵四千出省防城兵勇尙有六千又添派滿兵二千城守亦不爲單再四籌商仍應遵旨出省督戰或先將陸路之賊次第翦除少一路賊匪庶百姓早獲一日安全 上是之○予直隸傷亡道員朱鎮等祭葬世職○乙酉諭內閣軍營委員必須才具優長實心任事之人方資得力若帶兵大員瞻徇情面濫行畱用甚至將屢次獲咎各員及軍營獲罪

地方失事人等任意保畱濫竿充數不特糜費餉需於事無濟且恐招搖生事別滋弊端著通諭統兵大臣嚴查見在軍營奏畱投效文武員弁認真甄別擇其材能可用者方准畱營效力其餘一概斥退應回籍者飭令回籍業經定罪發遣者卽行發遣斷不准藉詞再行瀆請以除積習而勵軍心○諭明誼等奏哈密扎薩克回子郡王伯錫爾呈請情願捐輸銀兩以備軍需轉行請旨哈密扎薩克回子郡王伯錫爾見在呈請情願捐銀五千兩以備軍需實出於至誠惟軍營所需銀兩見已敷用該回子等藉此度日所捐銀兩毋庸賞收以示朕嘉獎體恤回子之至意○諭軍機大臣等慧成奏請飭琦善撥兵分駐揚州東路並跟追敗匪一摺逆匪自前月二十六日竄赴瓜州迭次諭令琦善等嚴防揚州東面並追剿瓜州賊匪兩旬以來未據該大臣將剿賊情形據實入奏朕

心實深焦急此時逆匪全在瓜州儀徵一帶正宜乘其奔突未定督兵進剿慧成等兵力既單且驚潰之餘豈能望其復振該大臣統領全軍責無旁貸務卽先行設法收復儀徵毋得株守揚州城內徒以按捕餘匪撫恤難民爲詞擁兵不動任賊遠颺至揚城撫恤事宜應卽責令地方官妥爲經理其瓜州一帶賊匪並著飭令陳金綬等督兵追剿扼要堵截以遏賊匪分竄之路將此由六百里諭令知之○諭上年任太常寺卿唐鑑呈進畿輔水利備覽一書朕詳加披閱於西北水利言之甚悉其水道各圖按照各府州縣條分縷晰亦極詳覈近年東南各省漕務疲敝若畿輔地方廣興水利於國計民生大有裨益著桂良於直隸軍務告竣時悉心體察各屬地勢酌度情形派明幹大員前往履勘妥爲籌辦畿輔水利章程本有成案可稽前此屢興屢廢總因地方官先存畏

難之見輒以一奏塞責該督務須認真督辦切勿視爲具文致負

委任畿輔水利備覽十二本著發給閱看將此諭令知之○以龔

文齡爲左副都御史

由大理寺卿遷

○以麟桂爲光祿寺卿畢承昭爲浙

江布政使恩錫署安徽按察使

候補知府

○丙戌諭內閣向榮奏攻剿

金陵逆匪獲勝一摺本月初四日向榮派已革提督福興遊擊張

國樑帶兵攻朝陽門之左總兵吉順明安泰等帶兵攻朝陽門之

右總兵秦定三德安等帶兵從中路直攻賊營是日自寅至巳鏖

戰四時斃賊三百餘名生擒十一名割獲首級五十餘顆此次向

榮攻剿金陵逆匪間大礮轟入城中斃賊極多復於城外斬獲多

名剿辦尙屬得手著該大臣卽乘此聲威督率兵勇併力攻擊以

冀迅殄逆氛毋得再事遷延致干重罪○陝甘總督舒興阿奏

臣

前聞廬州被圍緊急隨督兵由潁壽一帶水陸前進屢具公牘信

函知會江忠源屬其堅守並密爲約會以備官兵夾擊臣於壽州啟程時派已革總兵郝光甲前任雲南普洱鎮總兵楊青鶴酌帶官兵三千名作爲前隊當令由郡城西北面分兩路前進臣於初四日行抵距廬州四十里之吳山廟適江忠源差兵二名縋城送到覆函據稱賊匪圍困七門急待援兵等語查郝光甲所帶前隊官兵已據報稱初五日可抵郡城水西門高橋擇地紮營楊青鶴所帶之兵計亦陸續趕到前在店埠之已革臬司張印塘見移岡子集間信趕至見而約期隨同進剿卽於次日先攻水西門逆匪所紮木城郝光甲親率都司馬榮等帶官兵五百餘名攻打西面遊擊富昌等帶官兵五百餘名攻打東面千總段作棟等各帶兵勇往來策應夾擊張印塘派令遊擊何朝亮知州李登洲等共帶兵勇八百名由中路前進楊青鶴督率署遊擊吉蘭泰等分帶官

兵在土梁左右埋伏以備接應該員等約定後卽於初六日巳刻出隊兩路直撲木城逆賊望見併力出迎我兵奮勇攻擊前隊先至木城攀援直上逆賊極力抗拒木城賊匪見官兵逼近紛紛逃竄時第四五座木城內賊眾分爲兩路擁出鈔襲後路我兵恐被圍裹立時回擊守備包紀功等各帶伏兵齊起分投截殺賊匪恃其人眾死力迎拒何朝亮等所帶兵勇趕至助攻自已至酉鏖戰四時之久賊勢不支紛紛竄回北門木城堅拒不出殲賊約八百餘名生擒一名張印塘派出兵勇轟斃賊匪百餘名見在臣已帶兵行抵距郝光甲等營五六里之岡子集安營查該官兵於初次抵營開仗尙屬奮勉惟賊數眾多城垣周圍約三十七八里甚屬遼闊七門外俱有木城土壘此擊彼應勢甚猖獗必須先攻破一二木城以便與郡城西面官亭駐紮之總兵音德布候選同知直

隸州劉長佑兵勇聲勢聯絡並與郡城消息相通方可得手見在
趕緊設法會剿以期迅解城圍又奏臣於初四日在瓦埠途次准
袁甲三和春咨送摺彙內稱臣已行抵壽州西路空虛太甚潁州
爲皖楚豫交界適中之地擬將臣所帶之兵分撥三千名交和春
及江忠源分帶調遣並請飭臣帶兵千名折回潁州防賊西竄楚
豫惟臣因廬州被圍緊急帶兵赴援見已行抵廬郡督飭官兵攻
剿袁甲三等擬令臣折回潁州防堵殊覺窒礙難行又奏臣由水
路行至距正陽關八里塚查正陽關係在赴六安州迤南河內前
赴壽州並不由關經過適署壽州知州金光飭來見詢以地方情
形頗爲熟悉因與面籌正陽關防守事宜據稱正陽關係該州所
屬本爲緊要之區擬俟照料官兵過境後卽帶壯勇數百名會同
通判督飭本關團勇千餘名妥爲布置臣沿途訪聞該署知州緝

盜得力保衛有方前次賊擾臨淮鳳陽壽州得以安堵實賴該員
防守之力當卽札委金光飭酌帶練勇前往正陽關擇要設防以
扼賊由六安北竄之路和春袁甲三奏臨淮爲南北咽喉第一緊
要門戶防堵實不可緩惟廬州尙未解圍儻該逆大股盡撲廬州
尤爲萬分喫重以大局而論自應先其所急是以臣和春卽於十
二月初二日督帶兵勇自宿啟程初五日行抵臨淮初六日於河
之兩岸親加厯勘查得臨淮水陸要道遏賊北竄正當其衝見在
該處防守止有壯勇五百名萬不可恃因思漕臣福濟帶兵二千
餘名已自清江啟程無論水陸均須經過臨淮該漕督來皖督剿
本在江忠源抱病之日廬州大局無人支持是以特命該漕督前
來近日廬郡消息漸佳撫臣病已全愈各援兵亦陸續到齊臨淮
喫緊非常請飭令福濟卽行駐守臨淮旣與南路聲息相通並可

扼守北竄要路 上諭軍機大臣等舒興阿奏帶兵行抵合肥縣岡子集紮營前隊楊青鶴郝光甲等進仗業已獲勝又據和春等奏已帶兵前赴廬州此時諒可趕到見在廬郡城外援兵大集舒興阿與和春務須合力進剿並知照江忠源內外夾擊以期迅解城圍該督另片奏行近廬郡不能折回潁州並令金光飭扼守正陽關自係實在情形卽著照所議辦理將此由六百里加緊諭令知之○諭見在廬州城外援兵雲集聲勢益壯賊匪被剿奔突難保不北竄臨淮該處爲南北咽喉見在兵力單弱且無大員統帶設有疏虞所關匪細著福濟於行抵臨淮時探明廬州賊匪如已被剿窮蹙城圍已解自當扼守臨淮以防餘匪紛竄如廬州情形緊急仍應帶兵接應不可拘執並著與舒興阿和春袁甲三悉心酌度勿誤事機將此由六百里加緊各諭令知之○袁甲三奏據

委員徐曉峯稟同遊擊朱連泰統帶兵勇前赴蒙城探聞擒首劉洪立武大僧糾約六七百人直抵蒙城北關因聞官兵將到夥匪均欲解散該犯等不允徐曉峯等卽與蒙城縣知縣劉瀛階密商將該犯劉洪立武大僧誘至城內餘匪驚逃追官兵進城乘夜將劉洪立武大僧一併拏獲凌遲處死查武大僧係侍郎周天爵奏明四大天王之一其馬和尚陸老鳳江邦位等三人先經臣在西路時拏獲正法惟武大僧尙逃法網今幸一併伏誅洵足大快人心惟雉河集在蒙亳交界向爲捻匪巢穴茲因臣移營太遠外來捻匪又至該處勾結煽惑聚眾千餘人誓與官兵死關臣聞信後添派委員李萼麟等酌帶兵勇前往督同團練四面圍剿見聞該匪等由亳州竄至河南永城被官兵擊敗折回亳境已飭文武員弁跟蹤追剿永城縣地方官一體堵拏報聞○丁亥湖北巡撫崇

綸奏督臣吳文鎔因奉旨出省督戰欲再撥防城官兵四千名親往進剿共計先後撥兵七千餘名僅畱守城兵六千名止得會咨將軍仍調荊州滿兵二千名來省接濟臣與司道各員同向督臣籌商遵旨先遣臬司唐樹義帶領舟師前往攻剿俟餉力兵力稍可騰挪督臣再行親往庶防剿兩得其宜督臣不以爲可伏思軍務至重隨時變遷自當廣益集思以期妥協無如督臣任性偏執不聽人言一味拘泥以致百姓憤怒弁兵互調各不聯屬不得不據實奏聞至督臣統師出省所有防守各要務臣惟有竭盡心力妥籌辦理上諭軍機大臣等前因黃州一帶爲皖豫要衝關繫江北大局嚴飭吳文鎔親自統兵進剿已據吳文鎔將遵旨帶兵出省各事宜詳細具奏矣茲復據崇綸奏稱見值餉匱兵微應先遣唐樹義領兵進剿俟兵餉充足督臣再行親往乃吳文鎔任性

偏執恩促卽行等語崇綸前以吳文鎔閉城坐守參奏此次奏報各情何以自相矛盾殊堪詫異見在逆匪雖多半下竄皖省若被我兵剿捕緊急難保不由江路回竄楚北吳文鎔前奏帶兵出省自應遵照諭旨辦理著卽趕緊渡江親赴黃州督剿並著嚴飭唐樹義等迅速前往水陸會剿毋許少有遲誤其省城內外防守事宜仍責成崇綸嚴密布置毋稍疏虞至所調荊州駐防兵二千名已據吳文鎔奏稱令升任涼州副都統魁玉統帶赴省著卽催令迅速趕到協同防堵爲要將此由五百里諭令知之○諭據何紹基奏四川省捐輸廣額名數未定辦理土匪事涉兩歧並參將擅造關防需索騷擾一摺各省捐輸廣額所以鼓勵人心山西陝西四川三省首先捐有成數尤應亟予恩施俾士民知所向慕四川奉到恩旨據奏於五月間刊刻謄黃何以遲至數月未將各州縣

捐數多寡按照部議加廣學額經該學政咨詢該督何以不卽作
覆且據稱酉陽忠州夔州綏定俱係歲科並考此時無憑加額卽
須遲至三年應試諸生不免缺望殊非嘉惠士林之意著裕瑞迅
卽飭司查明各州縣捐數應加廣文武學額一面奏聞一面知照
該學政遵辦見當辦理借徵之時尤當迅速出示曉諭令該省士
民知所感奮毋再遲延至拏辦土匪爲安良急務前經該督奏明
訊實後就地正法降旨允行並疊經通諭各直省一體辦理茲據
該學政奏稱該督於六月間復飭各屬拏獲匪案必須首夥在十
人以外法無可貸之犯十有七八者始准照辦與前奏章程不符
用寬用猛事出兩歧恐地方官諱飾消弭得所藉口匪黨聞風益
滋膽玩見當團練緊急之時難保無外來奸細窺探勾結豈能以
匪犯多寡爲辦理之輕重設地方官以改勘費繁相率諱飾養癰

貽患咎將誰歸著裕瑞仍遵前旨飭屬畫一辦理以靖奸宄至各省辦理團練均係紳民自爲經理不准官吏藉詞勒索茲據該學政奏前任福建參將李萬春奉總督札諭前赴西陽刊用勘定西秀黔彭等處地方總辦團練事務關防行文地方官需索供應傳閱弓兵復集紳民爲籌薪水以致人心不服物議紛騰且該員置產西陽挈眷而去藉詞團練假公濟私似此貪劣之員必應從嚴懲辦著該督卽將李萬春撤回省城並查明該員需索騷擾實據及擅用關防藉端招搖情弊嚴參治罪不得稍涉回護將此由五百里諭令知之尋奏李萬春辦團並無需索騷擾情事惟刊用關防實屬不合請交部議處從之○戊子江忠源奏初一口夜水西門月城外所紮營盤因逼近賊營該匪連擲火罐其賊營之在高坡者又日夜用槍礮對城轟擊時城上守垛皆新集之勇並無槍

敵因卽撤回城內賊遂於營內開挖地道其大西門月城賊原挖三洞我兵從內迎掘二十八日尙未掘通隨被該逆點發一處當經駐守該門之湖南舉人鄒漢勛等登時搶護初二初三兩日我兵連破兩洞該逆伎倆已窮先是初一初二初三等日先後接據音德布劉長佑戴文蘭等函稟知已分帶兵勇先後行抵廬境音德布已紮營西城外二十里劉長佑戴文蘭到日復與音德布進營西城外之十里鋪初四日音德布劉長佑戴文蘭等三路進攻臣當於各門派兵分路縋城接應牽制賊勢時劉長佑等所帶各勇併力直前先燬賊營外哨棚二十餘座隨用火彈拋入賊營登時火起各勇乘勢撲殺該匪紛紛逃竄槍斃二十餘名生擒三名時西南賊營忽出數百人衝突南路壽勇抵敵不住復經劉長佑等督率兵勇奮力擊殺賊始敗退是日水西門所派兵勇由紫金

埂縋城而出斬獲長髮賊首級一顆槍斃賊十餘名得勝門一路
經臣派令參將崇禧等統帶兵勇直擣賊巢燬營五座斬獲長髮
賊首級三十顆生擒二十七名槍斃者一百餘名北門一路經外
委黃占超等帶勇縋城謀燬賊營斬獲長髮賊首級一顆槍斃十
餘名其餘各門約斃賊五六十名初五初六等日城內外合力夾
擊各路均有斬擒賊見援兵四集城內復更番接應不敢近撲城
門惟於水西門晝夜攻擊城內日受礮子百數十顆該逆慣用地
雷臣雖嚴密豫防而水西大西兩門常有耽耽思騁之意臣於萬
分焦急之時勉強鎮靜安定人心見在咨會督臣舒興阿並札飭
張印塘劉長佑等令其步步爲營漸逼城下迅解重圍又奏前奉
諭旨飭令舒興阿分撥陝甘官兵交和春統帶仰見 聖主知人
善任莫名欽感查和春自賊起廣西以來轉戰數年身經百戰賊

情熟悉謀勇兼優目前提鎮大員無有出其右者上年賊竄湖南經賽尙阿派令總統諸軍屢挫兇鋒賊眾畏憚因程喬采頻掣其肘徐廣縉甫到衡州又將其總統革去是以未能成功迨後賊勢日熾該署提督每對人言輒爲流涕忠義之氣歷久彌著見在廬州城外援兵雲集急需久歷戎行調度有方之員以資統制戴文蘭業經臣調入城中音德布寶非統御之才揚青鶴郝光甲初六日一戰臣在城上見其布置一切似於戰陣機宜尙未熟悉若得和春總統城外各路援兵鎮將以下均受節制必能迅解重圍遏賊北竄可否仰懇 天恩飭派和春總統城外諸軍節制各鎮之處出自 聖裁 上諭內閣見在各路援兵雲集舒興阿和春均抵廬州所有攻剿事宜自應專責總統大員以資得力和春久歷戎行謀勇兼著總統城外諸軍無論何路赴援官兵悉歸節制其

有不遵調遣者卽以軍法從事舒興阿自穎亳一帶赴援沿途險要情形均經親歷著卽妥籌扼守事宜以防餘賊竄逸其城內防守事宜卽著江忠源督同戴文蘭嚴密布置以期聲勢聯絡迅解城圍○江忠源奏初八夜據報楚北賊匪由斷水竄入英山揚言

欲入六霍等語查英山北通光固東通六霍

臣已飛咨河南撫

臣趕緊設防並咨督

臣舒興阿就城外酌撥兵勇前赴六安防堵

臣身在圍城未能先事豫防應請旨

將

臣交部嚴加議處上諭江

忠源奏據報湖北逆匪竄入英山自請嚴議江忠源見在廬州防

守雖於所屬地方未能兼顧究屬不能先事豫防著交部照例議

處○琦善奏查賊踞儀徵已逾一月

臣正派參將鞠殿華等帶兵於本月初九日馳往攻剿適於前一日經儀徵縣知縣都榮森等

分帶兵勇撲入城內殲賊多名並擒獲奸匪八名初十日卯刻江

口之賊紛紛上岸接應竄入南門鞠殿華等卽整隊前進該地方文武亦隨同進攻由東北二門攻入城內將城內之賊奮力剿殺並將所有餘匪驅出南門外從內河追至外河礮斃賊匪數百名落河淹斃者不計其數生擒八名奪獲旗幟器械多件悉將城市關廂賊匪剿逐無遺忽報老河影又有賊數百人登岸肆擾復經官兵分投堵剿追至江邊斃賊二百餘名奪獲大小船十五隻當卽焚毀餘匪悉乘舟入江臣於是夜酌帶弁兵暨西安馬隊親赴儀徵該縣城內外一律肅清但能實力扼守卽以杜賊北竄天長之路至三汊河樸樹灣等處之賊初七日用礮對官兵營盤轟擊我兵開礮擊退斃賊多名瞿騰龍德興阿督率馬步隊分三路迎敵另揀精兵徑赴河干焚毀賊船十餘隻賊棄營驚竄官兵追殺數百名溺死無算踏平賊營十三座儀徵河內凍青鋪東西石人

頭等處一律肅清初八日黎明臣琦善約同陳金綬率領將備由灣頭循運河東岸進攻瞿騰龍德興阿亦渡河來會另派將弁由三汊河西岸夾攻行至八里鋪賊見官兵卽開礮抗拒我兵亦擡礮連環轟擊斃賊無數當將賊船轟退賊房燒毀初十日探得賊棄營南遁至八里鋪復經瞿騰龍德興阿督兵過河追至四里鋪將兩岸賊房悉行焚毀斃賊多名又將河內賊船燒毀兩隻餘船揚帆南遁我兵乘勝追殺直抵瓜州維時天色已晚撤隊回營復探得瓜州賊營之下游已偏江口賊船七八百隻帆檣林立既不敵入內河迎敵又不遽向大江開行不知其意欲何爲官兵並無船隻無從火攻惟有由陸路相機進剿上諭軍機大臣等據琦善奏收復儀徵分路防剿情形一摺前踞揚城之賊旣已逃竄一空覓在又以收復儀徵空城入奏並稱江口賊船七八百隻旣不

駛入內河又不向大江開行究竟賊勢欲往何處竄擾奏報內均未聲敘該匪全股蟻集瓜州分擾三汊河等處琦善陳金綬若但知株守一隅任賊肆擾仍恐顧此失彼所有三汊河以下至瓜州一帶應如何設法追擊卽著琦善與陳金綬妥速籌商親督官兵前往堵剿前有旨諭令陳金綬帶兵由東路剿賊此時是否與琦善分路進兵抑係同在一處摺內亦未詳敘其天長六合一路尤須揀調精兵派員扼守並著琦善迅籌布置毋令再滋延蔓仍嚴飭武慶於浦口一帶加意防守以固藩籬本日據慧成奏稱東路需兵等語此時有無官兵可撥該處是否尙需兵力琦善既總統諸軍自應迎籌全局著仍遵前旨由琦善相機酌辦儻有疏失無論東西兩路琦善均不能辭罪也將此由六百里加緊諭知琦善並諭陳金綬雷以誠慧成知之○諭據江忠源奏連日戰守各情

前經諭令舒興阿將所帶之兵分撥和春統帶會剿嗣據舒興阿奏行抵廬郡卽派前隊進仗業已獲勝見在和春由宿州前進赴援計程應已趕到朕思該提督久歷戎行頗能熟悉賊情此時廬郡尙未解圍亟應迅圖剿辦免致日久遷延舒興阿所帶官兵著遵照前旨交和春統帶所有一切進剿機宜卽責成該提督妥速籌辦務與江忠源勦力同心密籌布置爲內外夾攻之計斷不准稍涉延誤致失事機舒興阿著卽將廬州後路扼守事宜相度緩急隨時酌辦並就近與福濟袁甲三互相知照兼可以壯和春前路聲威所有各路赴援官兵統歸和春節制如有不遵調遣者卽以軍法從事務期迅殄羣醜立解城圍以副委任將此由六百里加緊諭令知之○江忠源奏陳五省合剿事宜得旨所籌之方略足見汝謀國忠忱益分防則力單一處挫折各處怯懦欲求戴事

豈能速蕲合剿則力厚一軍得手諸軍氣壯欲圖淨盡易如反掌
分爲三路水陸並下誠爲不易之策第恐各不統屬互相觀望從
中再有疑忌者以致滿萬之軍中途渙散天下大局豈可復問見
在獨流之賊剋期可滅然此事不可延緩及早籌之爲是若直隸
肅清得緩我一步則操縱由我必可指日蕩平○以陶恩培爲山
西布政使清安泰爲湖南按察使由四川鹽茶道遷○以山西失守所屬
地方革布政使郭夢齡署按察使郭用賓職○己丑諭內閣前因
江忠源奏西安馬隊領兵官伊昌阿柯蒙額二員當玉山陣亡後
遽行逃去尙無下落已諭令查明該員等逃避情形卽行正法茲
據該撫奏稱於未經奉到諭旨之先已查明該二員前由店埠退
至定遠追尋軍火鍋帳後隨卽帶兵到廬州會剿請量予末減等
語是該員等情節尙與無故退避者不同伊昌阿柯蒙額著暫免

治罪畱於該撫軍營責令戴罪自效如不知愧奮著仍遵前旨卽於軍前正法○江忠源奏賊於十一日五更率眾四五百人大張聲勢先攻小東門經駐守該門之知府陳源堯及巡查該門之都司和寬帶廣東勇之守備程智泉督率兵勇二百餘名奮力抵禦臣隨添派楚勇三十名飛往協剿並以逆情詭譎慮其聲東擊西諄屬都司馬良勳戴文蘭加意嚴防維時小東門賊尙未退水西門月城迤北城堞忽然轟裂八丈有奇黑煙噴湧昏不見人缺口兵勇衣被火然躍入護城河內徧身皮膚如剝其餘兵勇始雖奮力圍截及見火光兇猛城身搖撼紛紛從馬道滾下惟馬良勳戴文蘭站立缺口抵死不動臣目擊情形計無生理親督兵勇冒煙衝上該逆乘勢蠶擁搶入一穿黃衣賊目手執大旗當先直上馬良勳以身迎敵該賊目用長矛向馬良勳胸膛直刺馬良勳以手

格之隨以長矛迎面刺死該賊目滾落城下旋又手刃一賊其旁

賊之蟻附者復經戴文蘭手刃數名

臣

復督率兵勇施放槍礮拋

擲火彈轟斃賊百餘名受傷者無算該逆冒死不能衝上乃少退

卻其小東門賊匪經陳源寬和寬程智泉督率兵勇並

臣

派去楚

勇奮力殺賊四五十名我兵乘勢從營內鈔出城根又跟蹤追斃

十餘名是日賊勢兇猛安危在呼吸之間仰賴

聖主威福得以

化險爲平

臣

見仍加意嚴防並咨會督

臣

舒興阿等剋日進剿以

圖迅解重圍

上諭此次賊用地雷轟陷城垛勢極危險江忠源

力保危城躬親戰陣督率將弁兵勇併力捍禦俾得化險爲平實

屬忠勇可嘉之至見在大兵雲集著江忠源督率兵勇與和春等

內外夾擊迅解城圍盡殲醜類毋稍遲延

○諭軍機大臣等勝保

奏築壘紮營設伏獲勝等情一摺逆匪占踞獨流靜海以來疊據

該大臣奏報賊勢窮蹙已極朕日望捷音並予以限期令於今歲
總要滅盡賊匪茲距歲底僅餘旬日該大臣此次奏報仍以小勝
塞責能否剋期掃蕩尙無把握况據片奏拏獲奸細供稱該逆兩
次暗遣逆黨假扮民人前往江南求救設使南賊乘間北來更將
何所措手勝保圍攻獨流逆匪已逾兩月此時賊勢日孤務須激
勵將士設法進攻直入賊壘埽穴擒渠以清畿輔斷不可再有遷
延致干重罪並嚴飭各路將弁認真堵截嚴防竄逸儻有疏虞惟
該大臣是問正在寄諭閒又據勝保奏十七日剿賊情形達洪阿
力疾督兵尙知愧奮已將該革員家產賞還並諭令瑞昌崇恩帶
兵迅赴靜海一帶會剿矣見在逆匪勢窮情急新營逼近賊壘尤
應加意嚴防毋稍大意將此由六百里加緊諭知勝保並諭德勒
克色楞知之○諭本日據江忠源馳奏賊匪轟城督兵搶護一摺

逆匪屢次用地雷轟城經該撫督率將弁兵勇搶護轉危爲安江忠源謀勇兼施深堪嘉尙馬良勳戴文蘭扼險殺賊尤爲奮勇已明降諭旨與守城出力人員分別獎勵矣見在和春帶兵計已趕到廬郡已有旨令其總統各路赴援官兵迅解城圍該撫卽與該提督激勵將士內外夾攻總以及早解圍爲要昨據奏賊匪由蘄水竄入英山揚言欲至六霍該處北通光固最關緊要江忠源雖在城中勢難兼顧仍當力籌全局隨時知照舒興阿福濟相機援應萬不可任賊北竄前據江忠源奏總兵音德布非統御之才究竟帶兵能否得力著江忠源與和春確查據實具奏毋任貽誤將此由六百里加緊各諭令知之○勝保奏官兵迎擊逆匪因礮身震裂暫退仍設伏敗賊情形得旨好礮致有炸裂疏忽之至汝欲保首領惟將此賊速滅又奏據賊犯供稱賊首李開方受傷斃命

批不過一箇賊首不必如此鋪張大頭目尙有幾箇務期生擒來京盡法極懲○已革翰林院侍講學士晉康奏揚城旣復亟宜收拾人心琦善坐失事機並不會同請罪得旨該大臣已單銜請罪汝等反謂未請罪事已至此豈能挽回已有旨令琦善兼籌東路朕看汝意不在劾琦善意在東路空虛汝摺內所陳總以琦善太分畛域不覺自己先存一成見凡言彼之過皆汝等之過欲蓋彌彰豈能逃朕鑒乎近見慧成所呈儀徵縣原稟並汝父批語今觀汝摺與批語字無二想一切文案必由汝代辦者軍營原無回避第汝旣與汝父在一處慧成前摺汝必知之復有此奏謂非豫籌站腳地步其誰信乎又奏聖躬偶患骸疾不可輕投藥餌若灸以黃艾當可立奏速效批朕非不知汝心第將此瑣屑之事入奏豈遂自以爲盡愛君之忱朕總以汝所辦之事若何爲憑知自愛

者不受諂諛朕膺元后豈受諂乎汝若以此取悅於朕適自誤也○以廬州守城出力賞巡撫江忠源等巴圖魯名號○庚寅前任工部左侍郎車克慎等奏捐輸經費請予鼓勵得旨著知照張亮基嚴辦汝等在籍人員紛紛奏事是撫臣以外又添一巡撫也嗣後事事稟商巡撫辦理○辛卯諭內閣前據宋晉奏請飭各路糧臺力行撙節一摺當交該部覈議具奏茲據戶部奏稱軍營文武官員均有例支俸廉鹽菜等項該署侍郎所指薪水名目本干例禁並憑陳軍營冒濫積弊各等語薪水一項既爲例所本無何以各路糧臺竟敢公然支領甚者且至五六百兩之多總由辦理糧臺之員不能破除情面正己率屬於大營支領雖明知違例亦必強爲支應而隨辦文員遂得因緣爲奸任意侵蝕逮至軍務告竣攤入例支例銷款內影射報銷錮習相沿實堪痛憾若不嚴行查

禁何以節糜費而儆侵貪著通諭見在統兵大臣及糧臺各大員於接奉此次諭旨後如有仍以薪水爲名列款支領及改換名目徇私濫給者一經發覺與受同科悉照冒濫軍需律治罪並各按所領所發之數加倍賠繳撥充軍餉此外凡係例不應支款項儻帶兵官員違例支領卽著糧臺大員據實參奏糧臺官員或有扶同應付等弊亦卽一體治罪追賠如爲數較多者查實後一律監追查鈔備抵決不寬貸其軍營官員兵勇領項以及各項支發總數亦著照戶部所議每月開單具奏交部備查該部卽將單式迅速通行毋得遲延歧異至征兵防兵定例供支本有區別見在用兵省分援引例案頗不畫一若俟題銷之時逐款覈減再行著追必致帑項虛懸徒延時日著各路軍營糧臺並防堵省分督撫及總局大員於接奉諭旨之日起勒限一箇月將應放數目章程先

行覈定聲明例案詳晰開單奏報並將糧臺辦事人員開單具奏以後續有更調隨時咨部以備查覈無論何處含混遷延均著戶部指名嚴參從重懲處當此度支孔亟籌餉維艱苟非除害救民朕何必頒發帑金重煩民力爾在事大小官員尚不思激發天良仍復各染氣習於應撥他省之款則動請截畱於他省解到之款則徒供揮霍不特無顏對朕亦何以服行間兵勇及出貲士庶之心若再不痛改前非力求撙節典章具在國法難逃如該署侍郎所引胡齊崙之案眾所共知毋謂朕言之不豫也將此通諭知之○琦善奏據六合縣知縣溫紹原稟本月十一日卯刻忽有賊船數隻自南岸觀音門駛至六合通江集壩外遙擁登岸焚燒民房後尚有賊船多隻自觀音門陸續開來當經該縣偕守備秦懷揚等馳往分途兜剿殺斃多名並有在籍檢討徐肅等招集民勇助

陣賊驚遁回船開往南岸在後各船亦俱駛回觀音門又浦口有
總兵武慶等率兵扼守屢經擊退賊船防堵得力茲據報稱本月
初六日有賊船六隻駛至三江口隨卽督兵撿拏並拋擲火藥口
袋燒毀船隻賊溺死無數生擒三十七名奪獲賊書信三封偽木
印一顆槍礮多件提訊獲賊僉稱自安慶奉賊渠楊秀青僞令調
回金陵內有僞將軍提督指揮監軍各一名初七日又據派出官
兵在觀音門截獲賊船六隻賊四十三名據供奉楊秀青僞令赴
鎮江瓜州一帶臣查逆匪書信內稱揚城攻剿緊急萬不可守不
如固守瓜州又有擬在瓜州添紮三營之語賊詭詐百端此信或
係真實賊情儀徵自克復後關廂一帶均稱安謐臣添派總兵李
志和等帶兵一千一百餘名前往駐守據稟江心時有逆船往來
老河影尙有逆船停泊江邊並未上岸滋擾至瓜州賊遁至江濱

修築甌城土城意圖負隅抗拒瞿騰龍等連日乘勝追剿直抵瓜州因賊營大礮連環施放一時未能得手見在陳金綬移營三汊河東岸之桂花莊總兵多隆武在養生堂駐紮臣已疊次函屬慧成移營前進臣查除三汊河之外尙有儀徵河道勢須兼顧撥至西岸適中地方駐紮以便調度得旨賊匪詭詐多端所獲逆書不可盡信瓜州逆匪情形動靜若何速查馳奏○予江蘇儀徵陣亡副都統哲克東阿等祭葬世職○壬辰諭內閣步軍統領衙門奏拏獲刊刻並未發鈔奏章人犯請交部審辦一摺羅祥張義興王得均王繼遠著交刑部審訊所刊奏摺既據羅祥等供係吳廷溥交給刊刻而鳳保等同奏摺內並未據實指明係何人發交已屬有心含混且以報房前次漏刻諭旨等詞牽砌入奏尤爲意存飾辯給事中吳廷溥於並未發鈔摺件輒卽擅行刊刻實屬任性妄

爲著先行交部嚴加議處給事中鳳寶陳枚玉山聯福御史彭慶
鍾隆慶蔡徵藩孫鳴珂志文於回奏時聲敘模糊顯有瞻徇情弊
均著先行交部議處○和春奏臣於十二月十四日行至合肥梁
園尙未准舒興阿撥兵前來差探廬郡賊勢雖經我兵攻剿疊獲
勝仗而賊匪甚眾東南面賊匪尤多此二處緊接北路店埠正當
其衝並無官兵堵禦甚屬空虛督臣舒興阿帶領官兵五千名到
廬在岡子集紮營已革臬司張印塘已移紮岡子集與舒興阿相
近此外尙有總兵音德布江忠源之弟江忠濟共帶兵勇四五千
名是西北面兵勇約萬餘名查逆匪見在大股圍攻廬城東南面
爲北路咽喉實屬喫重必須厚集兵力趕緊進剿一面在店埠扼
要堵禦使該逆無從北竄以冀迅解重圍惟臣帶兵僅止千名於
十五日卽由梁園繞道馳赴岡子集與舒興阿面商撥兵堵剿舒

與阿以所帶官兵僅敷調遣不能分撥婉商再三未能允行並令
臣前赴西面以就兵力伏思店埠本屬北路門戶且廬城東南面
賊匪甚多自當加意嚴防始可遏其北竄臣既到廬未便以兵力
過單置要隘於不顧因聞都統常清帶有馬隊七百餘名由定遠
前進即經先行飛咨駐紮店埠臣由岡子集折回即帶同密雲熱
河兵馳赴店埠紮營堵禦並飛催參將劉玉豹趕緊帶兵來廬設
法進剿但兵力仍形單弱查見隨漕臣福濟之參將嵩瑞帶有山
東官兵四百餘名此時福濟既在臨淮防堵此起官兵業經飛咨
趕緊派撥馳赴店埠已革臬司張印塘原帶兵勇千餘名見在西
面亦已飛調迅速前來再臣在鎮江原帶之湖南三四五起官兵
七百餘名請旨迅飭向榮即令鄭魁士星速帶領兼程來廬以便
攻剿如此各路抽調若趕緊到防則兵力稍厚自當迅速進攻以

解重圍 上諭軍機大臣等和春奏行抵合肥梁園地方察看西北面兵勇約有萬餘而廬州東南面逆匪最多又爲北路咽喉必須厚集兵力方能由店埠一帶進剿見在該提督帶赴店埠之兵僅止千餘名加以張印塘原帶兵勇亦止千餘名此外催調之兵又恐緩不濟急若再稍有稽延廬州城內餉乏兵疲深爲可慮著舒興阿卽遵前旨迅將所帶官兵分撥二三千名交和春統帶卽由店埠趕緊赴剿如所撥將弁或有託故推諉者卽著和春查明以軍法從事廬州赴援之任朕已專責和春儻該提督有意遷延致誤事機自難逃朕洞鑒若各路帶兵官員意存掣肘亦不能曲爲寬宥也將此由六百里加緊諭令知之○諭見在廬州城圍未解正當勦辦喫緊之際必應厚集兵力以期迅殄逆氛所有和春前在鎮江原帶之湖南官兵七百餘名素稱得力且爲該提督親

信之兵著向榮於接奉此旨後卽飭已革副將鄭魁士統帶啟程馳赴廬州交和春調遣以資攻剿不准稍涉延誤其鎮江官兵是否足敷堵剿仍著該大臣就近籌撥毋致顧此失彼連日金陵進攻情形及城中賊情若何江面船隻若干未據奏報揚州儀徵竄出賊匪全股麇集瓜州江口究係欲向何處竄逸亦未據琦善等探明入奏該逆占踞長江聯絡一氣而我兵南北兩岸聲息不通任令賊蹤紛紛逃竄統兵大帥所司何事本日慧成奏據探稱金陵賊營惟雨花臺最大初四日賊至紫金山與官兵相遇殺賊甚多僞王府被天火焚燒初五日官兵打仗賊放火箭反自燒其營百姓乘勢縱火斃賊無數等語如果屬實大有可乘之機卽著妥速籌辦據實奏報將此由六百里加緊諭令知之○以麟桂署浙江布政使

由光祿寺卿署

楊能格署江甯布政使

由四川北道署

○命升任浙

江布政使畢承昭畱安徽和春軍營差委○甲午陝甘總督舒興
阿奏十六日夜四鼓時聞廬郡城內礮聲不絕總兵楊青鶴郝光
甲等帶領將備官兵出隊救援臣營亦卽派兵接應因道路橋梁
已被逆賊拆毀斃斷又係黑夜之間中有賊營阻隔槍礮齊施該
逆拌死抵禦相持不下另股仍在水西門外用地雷將城轟裂數
丈當經撫臣督飭兵勇卽時補塞詎該匪復於南門小東門等處
用長梯數百架爬城並由城外紛投火彈火毬致守城兵勇慌亂
逃散雖經撫臣督飭弁兵迎頭截擊殺賊數百名乃該匪愈集愈
多我兵抵擋不住天將明時城已失陷逃出民勇均言撫臣在水
西門內禦賊陣亡據署臬司張印塘總兵音德布報稱情形大略
相同並據音德布稱撫臣之弟六品銜江忠濟帶領楚勇千餘名
同時救援無能爲力臣聞信之下五中焦灼憤懣萬分查撫臣江

忠源忠勇素著赴守郡城一月有餘力疾辦公晝夜不形疏懈官民無不感戴無如城垣遼闊內外兵力均單竟至城亡遇害情實可憫應否從優議卹之處出自恩施和春奏臣於十七日馳赴店埠將見帶之兵千名同副都統常清所帶馬步隊七百餘名先在店埠紮營防堵一面設法進剿乃正在紆築營壘間忽聞逆匪用地雷轟陷城垣廬郡失守臣查此股逆匪本山江西擊敗竄至皖省投陷安慶占踞舒桐二縣又復直撲廬州因城外民房未經燒毀該逆偷挖地道致城失陷亟宜趕緊圍攻以冀克復且廬郡爲北路咽喉堵禦尤爲喫緊必須添派官兵合力兜剿查揚州業已收復賊匪退踞瓜州該處兵力尙厚可以抽調又見在金陵帶兵之總兵秦定三屢經戰陣素稱勇敢請旨飭令揚州統兵大員趕緊酌撥官兵數千名作速來廬並請諭知向榮派令秦定三隨帶

官兵一二千名星夜前來其前調湖南官兵亦卽催令迅速啟程以資合力攻剿迅圖克復 上諭內閣據舒興阿奏本月十六日夜廬州郡城失守江忠源在水西門內禦賊陣亡等語覽奏憤懣之至江忠源以知縣調赴軍營屢立戰功超擢臬司令其幫辦軍務本年在江西守城尤爲出力倍著忠勤旋卽授爲安徽巡撫由湖北力疾赴皖甫抵廬州卽值逆匪圍攻郡城督率文武紳民兵勇竭力守護一月有餘屢次出奇制勝力捍危城方資倚畀乃因援兵不力以致賊陷廬州捐軀盡節深堪悼惜江忠源著追贈總督卽照總督陣亡例賜卹入祀昭忠祠任內一切處分悉予開復應得卹典該衙門察例具奏並著於殉難地方建立專祠以慰忠魂舒興阿統帶重兵旣已行抵廬州不能督兵竭力救援又不遵旨撥兵交和春統帶調遣以致郡城被陷盡臣捐軀實屬孤恩大

負委任著卽革職戴罪自效和春自徐州赴援帶兵無多所有舒興阿管帶之兵卽著交和春統帶各路援兵均歸調遣務當督率鎮將激勵兵勇迅圖克復郡城毋稍遷延致干重罪尋予江忠源祭葬世職諡忠烈○諭駱秉章曾國藩奏勦辦常甯土匪疊獲勝仗一摺湖南常甯等縣土匪肆擾經該撫等派委員弁前往援捕並飭各州縣不分畛域合力兜擊該匪竄撲桶水地方經候補知府張榮組等帶勇堵擊殺斃一百五十餘人生擒五十名餘匪竄撲嘉禾縣該署縣任瑛開城出擊殺斃多名賊匪竄至藍山經該縣張嗣康督同典史倪玉齡並紳士兵勇等開放槍礮轟斃追殺賊勢大挫其道州所屬之巖頭山勾結土匪俱飭兵勇追捕殺斃多名等語此次湖南土匪大經懲創在事文武合力圍剿自不難悉數殲除該撫等務須設法堵截盡絕根株○諭軍機大臣等寄

諭欽差大臣勝保逆匪占踞獨流靜海將及三月該大臣統領諸軍所請添兵籌餉各章奏朕無不立允所請見在各路大兵已有兩萬餘眾逆黨僅餘數千朕日望捷音以爲年內必能掃蕩乃該大臣等此次片奏賊匪情形仍以慎重爲詞一切措置全無把握本日據舒興阿奏廬州於十六日夜被賊攻陷巡撫江忠源殉難該處爲南北咽喉賊勢如此披猖若不將獨流之賊趕緊剿滅設廬州大股乘間北來時勢將不可問朕心焦灼萬分該大臣身爲統帥勞師糜餉日久無功已難寬宥若再不倍加奮勉遷延貽誤自問當得何罪著仍遵屢次諭旨激勵將弁兵勇設法進攻剋期掃蕩不准以賊情兇悍爲詞藉圖延宕所請令德勒克色楞來京密奏機宜之處卽著迅速來京將此由六百里加緊諭令知之○諭本日據舒興阿和春先後馳奏廬州失陷巡撫江忠源殉難賊

勢猖獗各等情覽奏焦急之至廬州爲南北咽喉最關緊要和春所帶兵勇甚形單弱舒興阿雖帶兵數千亦恐不能得力必須添派重兵以資勦辦著琦善於揚州軍營撥兵四千名派薩炳阿管帶向榮撥兵一二千名派秦定三管帶卽日馳赴安徽統歸和春調遣逆匪見踞瓜州揚州情形較緩金陵久未克復逆匪已紛擾安徽江北情形更爲喫緊勢不能不先其所急著該大臣等接奉此旨卽派該員等星速帶兵前往不准片刻遲延儻惟知擁兵自衛不顧江北大局設有貽誤朕惟該大臣等是問將此由六百里加緊各諭令知之○諭本日據舒興阿奏逆匪攻陷廬州江忠源殉難已明降諭旨將舒興阿革職責令戴罪自效並令和春統帶各路官兵迅速進勦福濟見已授爲安徽巡撫責無旁貸著卽帶兵前往會同和春合力攻勦一面克復廬州一面遏賊紛竄萬勿

遲延致干重罪該撫請將徐州糧臺移往鳳陽此時情形應否改設著卽妥籌辦理青州知府恩錫已有旨飭令赴皖聽候調遣所請張鼎元帶兵赴皖並河南應解餉銀已諭令楊以增英桂照辦矣將此由六百里加緊諭令知之○諭前因廬州情形緊急諭令舒興阿和春前往督剿並以和春熟悉賊情特命總統諸軍惟兵力較單令舒興阿酌撥官兵二三千名俾資調遣乃該督既不肯抽撥又不能督率鎮將竭力攻剿以致郡城被陷蓋臣捐軀實堪痛憾江忠源忠勇素著屢立戰功朕方欲畀以剿賊重任今竟因援兵不力城陷陣亡覽奏之下悼惜殊深和春見在進紮何處是否尙在店埠所有城外各路兵勇一萬餘名卽著統歸和春管帶調遣福濟所帶兵勇計日亦可趕到兵力尙不甚單江忠源之弟江忠濟等所帶之勇亦必得力並著和春酌量調撥加以激勵以

備助勦舒興阿係專派統兵赴皖大員既已行抵廬郡尙不趕緊
攻勦冀解城圍乃擁兵自衛坐誤事機本日降旨革職令其戴罪
自效若再不知奮勉著和春奏明卽於軍前正法和春膺茲重任
務當與福濟暨諸將士合力同心激勵兵勇設法進勦迅圖克復
若再遷延時日致賊久踞廬州或乘間北竄惟和春是問正寄諭
間據和春奏到廬州失陷情形請添調大兵攻勦並請撥餉銀各
摺片本日已諭令琦善向榮撥兵馳赴安徽統歸該提督調遣並
諭黃宗漢速撥兵餉六七萬兩迅速解往矣將此由六百里加緊
諭知和春並諭舒興阿知之○諭本日據舒興阿和春先後馳奏
廬州郡城於本月十六日夜失守巡撫江忠源陣亡各等情據稱
所帶官兵待餉孔殷無從支領見又添派官兵尤應寬爲籌備著
黃宗漢於浙江省無論何款先行籌銀六七萬兩派委幹員迅速

解往安徽軍營以資接濟並著於起解前期飛咨和春以便派員迎提一面知照沿途地方官妥爲護送毋得藉詞推諉致誤要需將此由六百里加緊諭令知之○諭逆匪竄踞廬州勢益鴟張深恐乘機北竄前經疊次諭令楊以增等嚴防河岸諒已遵照辦理此時情形更爲喫緊尤當嚴密防範勿稍大意其應如何擇要駐兵堵剿之處著楊以增長臻張亮基英桂迅籌妥辦總期聲勢聯絡彼此應援不可稍分畛域儻任聽逆匪偷渡北竄朕惟該督撫等是問本日據福濟奏部撥河南餉銀及截畱未還兩項共九萬餘兩豫省至今未解見在軍餉萬分急迫請飭該撫將接壤安徽之完善各州縣應完地丁銀兩照數劃出就近解皖等語著英桂卽照所請辦理毋稍遲誤另片奏張鼎元前在安徽防堵熟悉情形著楊以增迅飭該員帶山東兵二百餘名配齊軍械馳赴廬鳳

一帶聽候福濟調遣原片均著鈔給閱看將此由六百里加緊各諭令知之○諭寄諭黑龍江將軍英隆等適據景瀄奏俄羅斯分立界牌之處俟明年春融時再行派員查明妥辦等因請旨一摺無妨礙之處尙難懸揣此時路徑旣係不通著俟明年江河融化之後卽派協領富尼揚阿先由水路從畢占河直抵海岸詳細查明再行妥辦景瀄原摺著一併鈔給閱看○勝保等奏逆匪受創復決隄放水見督兵設法宣洩賊糧已盡斷不能久持得旨賊情兇悍共見共聞然不能藉此耽延屢次嚴批已無復可再諭若執意玩視必以汝身家性命相抵又奏管帶礮位章京中公中佐領黃周賓受傷陣亡請照例議卹批黃周賓著照例議卹彼日之進仗失礮無疑因何掩飾入奏僞爲炸裂殊屬可憾勝保出京甫及一

年何沾染習氣若是之深著據實明白回奏是汝之福若再不肯

明言試問朕賜汝之神雀刀何所用耶○以福濟爲安徽巡撫

清由

運總督遷○以私刻奏藁革禮科給事中吳廷溥職○乙未諭內閣前

因各直省殉難官紳忠義可嘉深堪憫惻特飭該部將應得卹典

分別從優定議茲吏部禮部兵部遵旨覆奏各一摺著照所請除

特旨追贈並指項賜卹各員毋庸議外所有優卹人員限於定例

不能從優辦理者文職官員均著各按官階給予贈銜武職官員

均著照贈級之例各按卹銀從優之階給予贈銜額外委及鄉

勇中武生武監生指階者著照指階辦理其餘議卹各案均著給

外委贈銜無庸給予世職其革職續經陣亡各員除卹銀世職減

降議給外均著贈還原銜至文武官員格於定例不能請諡入祠

者亦著照禮部所擬二品官員著該部聲明請諡八旗及駐防三

品官員並漢文職三品官員除例應入祀京師昭忠祠外再入祀
陣亡地方府城昭忠祠文職四品武職三品人員著再入祀京師
昭忠祠文職五品武職四品以下著再入祀陣亡地方府城昭忠
祠額外外委及貢監生童有贈給職銜及照官員例議卹者均一
體入祀陣亡地方府城昭忠祠其減半議卹各員各按原銜照此
次章程分別入祀各昭忠祠官紳殉難家屬著分別給銀建立總
坊在本邑忠義孝弟祠及節孝祠內設位致祭以示優卹至奉旨
照例賜卹各員仍著照例辦理無庸再行加增以昭區別所有單
開各員無論已奏未奏均著照此次新定章程辦理著爲令○以
邵燦爲漕運總督調周祖培爲吏部左侍郎以杜翰爲工部左侍
郎由學士遷○調畢承昭爲安徽布政使由江調○予安徽廬州陣亡
協領柯蒙額祭葬世職○丙申諭軍機大臣等許乃釗奏招撫未

成委員被害等語前據該署撫奏上海逆匪窮蹙請降其情已屬支離朕早知其必有詭計今果事機中變雖係謝繼超勇於圖功孟浪輕進亦由該署撫料事未周輕爲憑信當逆匪修築城堞墜坍地道之時豈不知投誠之說萬不可恃而猶思遷就成功任令謝繼超進城說降可謂無識見在城已被賊修整地道亦壞城內接應之人又被殺賊匪又得印照可以影射種種情形皆該署撫辦理不善所致尙云機會可失不過仍據偵探之詞冀其內潰亦竟別無良策似此遷延何時能事著許乃釗卽督飭在事鎮將乘此礮臺添成迅速併力進攻斷不准再聽招降謬論更滋貽誤朕總以克復上海剿擒賊首爲慮該署撫若不趕緊督辦僅以空言塞責恐不能當此重罪也其投誠之李少卿雖據審訊明確惟與前此該署撫所奏副賊目李少軒姓名相似恐亦不盡可信仍

須密爲防範勿涉大意怡良等另摺具奏請畱廣東關稅等銀二十萬兩等語著准其全數截畱先由浙江省籌墊徑解江蘇見在安徽需餉甚急昨已諭黃宗漢籌銀六七萬兩解交和春軍營此項廣東餉銀過浙時仍遵旨迅速解往安徽著怡良許乃釗飛咨黃宗漢照辦毋稍遲誤至佛蘭西俄羅斯船隻既據查明並無情弊亦無要求仍著隨時體察防範勿滋生事端將此由六百里加緊各諭令知之○諭張芾奏請刊刻邸鈔發交各省等語識見錯誤不知政體可笑之至國家設官分職各有專司逐日所降明發諭旨及應行鈔發內外臣工摺件例由內閣傳知各衙門通鈔卽由各該管衙門行知各直省或由驛站或交提塘分遞該衙門自能斟酌緩急輕重遵例妥辦豈有各省大吏無從聞知之理所有刊刻邸鈔乃民間私設報房轉相遞送與內閣衙門無涉內閣爲

絲綸重地辦事之侍讀中書從無封交兵部發遞事件若令其擅發鈔報與各督撫紛紛交涉不但無此體制且恐別滋弊端近日被兵省分間有道途阻隔者然如鄰近江西之福建湖南廣東等省照例陳奏事件依舊專弁齎京並無稽滯卽江蘇浙江摺差亦俱繞越行走江西省城久已解圍道路已通而張芾奏事無論有無緊要事件動用驛報乾隆嘉慶年間疊奉諭旨申禁定例擅

動驛馬處分綦嚴若吝惜小費輒因一二件關涉軍餉補查請卹

各事率由驛遞不特有違定例亦令聞者詫異張芾於陳奏事件

屢經嚴旨斥責仍不知儆畏復逞臆見率行瀆請實屬謬妄著傳

旨嚴行申飭將此由四百里諭令知之○命工部左侍郎杜翰在

軍機大臣上行走○以趙光爲工部尙書調彭蘊章爲兵部左侍

郎以龔文齡爲工部右侍郎

由左副都御史遷

○命楊需以二品頂帶爲

順天府府尹以庚長爲直隸布政使

由兩淮鹽運使遷

○以徇庇屬員革

兼管順天府府尹工部尙書翁心存府尹宗元醇職○以上海久

未收復署巡撫許乃釗下部嚴議予死事知府謝繼超祭葬世職

○丁酉張芾奏

臣

前次請畱滇黔銅鉛銀兩欽奉諭旨屢次嚴催

不准截畱何不知緩急置全局於不顧等因

臣

伏讀之下恐懼悚

惶莫能言喻竊查江西省城本年五月間彼賊竄擾閉城之日藩

司糧道兩庫共存銀五十餘萬兩至八月解嚴之日用銀不滿十

萬兩因安徽撫

臣

江忠源等帶兵赴楚給發一月口糧共用銀五

萬餘兩存銀無多愈形支絀原擬俟陸續徵收及勸捐等項稍資

應用乃因水災兵燹後催科竟無起色勸捐亦屬寥寥總緣賊氛

尙近商民多未復業一切不能周轉是兵民交困不特全局可憂

卽江西一省已有不可終日之勢據藩司詳請將應撥雲貴銅本

鉛本等項奏請截畱銀三十五萬兩實因無款可籌暫爲騰那並
非有見銀存庫欲請畱用也見在寇患未平江西一省本係自顧
不暇卽稍有餘力尙須協濟鄰省所有雲貴銅鉛等項銀兩萬萬
不能籌撥查運道未通銅鉛亦不能北上可否暫停採買其雲貴
二省兵餉或令該省自行勸捐籌辦伏候 聖裁 臣至愚極陋過
蒙委任遭遇時艱每形隕越孤負鴻慈汗顏無地 皇上責以一
籌莫展庸愚無能 臣無所逃罪至昧良喪心 雖不肖萬不忍出
此亦不敢出此也抑 臣更有請者見在 宵旰焦勞臣工或未必
盡能仰體而 訓諭誥誡之時 聖心自有權衡則受者知所儆
惕聞者罔不悚服此尤 臣區區之忱不僅爲一身計也 上諭內
閣前據張芾奏請畱滇黔銅鉛銀兩朕因其不知緩急任意截畱
保舉守城各員太覺亢濫於批摺內嚴旨切責正望其激勵有爲

兼籌全局庶不負朕諄諄訓誨之意乃本日據奏籌撥軍餉摺內不知感愧仍復曉曉置辯張芾係內廷翰林曾司部務由學政特簡巡撫值此軍務方殷籌餉孔亟之際應如何酌度緩急詳慎舉劾於奉到諭旨時虛心體會爲朕分憂乃據所奏但以庸愚引咎轉視訓諭爲多事實屬負氣妄言有負委任張芾著交部議處○僧格林沁奏逆匪占踞獨流靜海復又分賊在獨流靜海之間五里莊地方築成木壘竟成三窟之勢且據拏獲奸匪供稱該逆將官兵失去礮位安放木城之內是該逆壁固壘堅連得利器足資抗拒見在東西兩面日夜開礮轟其巢穴該逆堅匿不出連日總未接仗近獲由賊營逃出之人供有逆匪婦女扮作乞丐往南乞援並南省之匪二月可到等語雖似逆匪捏造之言未足盡信然總宜迅速蒞功方免他慮 上諭逆匪情形實非窮蹙汝前奏一

俟冰堅即可進偏火攻已隔多日並未見續奏是否得力是何攻

法再據汝所聞有何可乘之機著一併據實密奏○以楊以增兼

署漕運總督

由江南河道總督署

○已亥諭軍機大臣等朕因靜海獨流賊

匪負嵎日久疊次切責勝保迅速剿除倚任既專兵力亦厚乃遷

延三月尙未奏功雖屢經接仗獲勝奏稱該逆窮蹙已甚而以京

中所聞賊眾爲數尙多情形仍屬兇悍非一兩仗所能剿滅淨盡

該處距京師甚近時屆歲除未聞捷報殊深焦急且南軍失利大

股逆匪蟻聚廬州其覬覦北竄之心焉能保其必無非將此股先

行剷除不足以寒南中賊膽勝保帶兵勇往固非有意玩延然朕

心寢食不安勝保何竟不能仰體一二殊負委任每一念及憤懣

交加該逆全踞東面勝保之兵亦多向東面攻剿而獨流至靜海

五里莊地方又有該逆木壘必須重兵分路圍剿奪其隄埂斷賊

南北救援之路方能得手止有僧格林沁駐軍王慶坨離賊營三十餘里相距較遠不如歸併一處以壯聲威該大臣等本係共辦一事原無畛域之分著僧格林沁卽日統兵前進與勝保會合籌攻所有該參贊大臣營內之三盟官兵及培成綢閣那敷德等所帶馬步各隊均可酌提歸前路以資攻剿至伊勒東阿史榮椿所帶之兵或令前進或應仍畱王慶坨駐紮以爲後路聲援均著一體妥籌布置斷不准以防後路爲詞致誤事機僧格林沁自出京後並未與賊接仗趁此久蓄聲威必可埽數殲擒若再有耽延何顏對朕僧格林沁抵獨流後應於何處駐紮或會攻獨流或分攻何處務須與勝保和衷商榷朕必不爲遙制總期剋日將獨流靜海與五里莊賊匪盡數剿滅萬不可令賊竄逸再滋延蔓儻能迅奏膚功僧格林沁與勝保均當策勳懋賞如再事因循或各存意

見互相推諉以致更延時日僧格林沁與勝保均不能稍從末減功罪賞罰皆由自取朕亦無可再諭卽盼捷音以副委任勉之懍之將此由六百里加緊各諭知之○諭琦善奏移營進攻瓜州賊匪另片奏皖豫毗連請嚴防北竄又雷以誠奏存勇過多酌量裁減一摺該逆自竄出揚州儀徵以後疊據琦善等奏報賊船全聚瓜州江口究竟欲向何處竄逸迄未切實聲敘茲據奏稱瓜州賊船均已遁回金陵未聞欲行北竄之事是否確實設安徽沿江一帶又有警報豈得以賊船已返金陵遂謂非瓜州大股意存誘卸已屬顯然卽如常清之兵遵調赴援廬州豈能再令折回和州旣與浦口相近琦善仍應撥兵設法嚴防何得虛言搪塞豫爲站腳地步此等伎倆豈能逃朕洞鑒見在廬州被陷巡撫江忠源捐軀該處係北路咽喉逆餒猖獗殊甚儻或覬覦北來事勢何堪設想

琦善身爲總統設有疏虞惟該大臣是問至於瓜州賊匪業已築壘堅守苦不及時攻克又成負隅之勢萬一復擾揚州或儀徵等縣琦善將何顏面見朕耶雷以誠前募鄉勇旣不足恃自應加以裁汰其見存各勇二千餘名亦未便全行撤散仍著雷以誠管帶約束以助兵力據琦善奏稱亟須向前移營應如何分撥布置仍著琦善妥籌辦理總之揚州儀徵賊匪均係自行竄去固因勇潰所致亦並非兵力驅除此時惟有併力急攻瓜州嚴防北竄稍贖前愆尙何暇負氣紛爭嘵嘵置辯耶將此由六百里加緊諭知琦善並傳諭陳金綬雷以誠慧成知之○是月蠲緩直隸安州等十七州縣暨豐財等四場浙江仁和等九場竈地水災風災山西潞城等七縣被擾地方新舊額賦並賑貧民口糧貸倉穀籽種緩徵山東樂陵等四縣衛河南蘭儀等十六縣水災吉林三姓歉收地

方新舊額賦○是歲朝鮮暹羅琉球緬甸南掌越南入貢○會計
天下民穀數除江蘇湖北湖南未經冊報外直隸等省通共大小
男婦二萬九千七百六十二萬六千五百五十六名口存倉米穀
二千零六十八萬三千七百九十七石五斗五升三合六勺